

四庫全書

史部

欽定四庫全書

浙江通志卷二百七十

藝文 十二

賦 下

吳興賦

元 趙孟頫

猗與休哉吳興之爲郡也蒼峰北峙羣山西迤龍騰獸  
舞雲蒸霞起造太空自古始雙溪夾流由天目而來者  
三百里曲折逶迤演漾漣漪東爲碕灣匯爲湖陂泓渟

皎澈百尺無泥貫乎城中達於諸毗東注具區渺渺潏潏以天爲隄不然誠未知所以受之觀夫山川映發朗照明月清氣焉鍾沖和攸集星列乎斗野勢雄於楚越神禹之所底定太伯之所奄宅自漢而下往往開國洎晉城之攬秀據實沿流千雉面勢作邑是故歷代慎牧必掄大才選有識前有王謝周虞後有何柳顏蘇風流互映治行同符皆所以宣上德音俾民歡娛況乎地土之所生風氣之所宜人無外求用之有餘其東則塗泥

膏腴畝鍾之田麥粟再收秔稻所重玉粒長腰照筥及  
箱轉輸旁郡常無凶年其南則伏虎之山金蓋之麓浮  
圖標其巔蘭若棲其足鼓鐘相聞飛甍華屋衡山絕水  
魚史所錄盤紆犬牙陂澤相屬蒹葭菰蘆鴻頭荷花菱  
苔鳧茨萑蒲軒牙四望弗及烏可勝數其中則有魴鯉  
鰱鱮鉞頭小白鱸鰕餘鰻鼉龜鼈有蛟龍焉長魚如  
人歆浪生風一舉百鈞漁師來同網罟笊簍罩汕是工  
鳴榔鼓枻隱然商宮巨細不遺噲噲喁喁日亦無窮其

西則重岡複嶺川原是來其北則黃龍瑤草之洞玲瓏  
長壽之塢懸水百仞既高且阻砦研嶽崙歲磊砢怪  
石萬數旅乎如林其高陵則有楊梅棗栗榲梨木瓜橘  
柚夏孕枇杷冬華槐檀松柏椅桐梓漆之屬文竿綠竹  
篠蕩雜還味登俎豆材中宮室下逮薪樵無求不得其  
平陸則有桑麻如雲郁郁紛紛嘉蔬含液不蓄長新陸  
伐雉兔水弋鳧雁舟楫之利率十過半衣食滋植容容  
衍衍既樂且庶匪教伊慢於是有搢紳先生明先聖之

道以道之建學校立庠序服逢掖戴章甫濟濟多士日  
躋千古乃擇元日用量幣尊元酒陳簠簋選能者秉周  
禮贊者在前獻者在後雍容俯仰周旋節奏成禮而退  
神人和右當是之時家有詩書之聲戶習廉恥之道辟  
雍取法列郡觀效誠不朽之盛事已或者難曰自古論  
著之士曷嘗不識人物紀風俗哉夫人才者濟時之具  
而風俗者爲治之資也今子徒摭摭細碎排比貨食高  
談不切炫耀自飾莫大於斯二者顧乃略而弗錄雖文

奪組繡聲諧金石竊爲子不取也僕應之曰否否子獨  
不聞夫子之言乎十室之邑必有忠信今年踰千載地  
且千里人物之富胡可殫紀史冊畢書可無贅矣若乃  
風俗之汙隆在爲政者之所移易又弗可得而定著矣  
夫吳雖分在江左嘗被至德之風矣且吾聞之風行而  
草偃日中而表正上行下效置郵傳命辟若季子爲守  
言游爲令以仁義爲化禮樂爲政鎮以不貪之寶喻以  
不言之信即刑可使不用俗可使益盛方將還敦朴於

上古考休祥於庶徵今美則美矣又豈可遂以爲定乎  
於是難者唯唯逡巡而失意

磐陀石觀日賦

元 吳 萊

粵東游於海徼兮得偉觀於陽阿登磐陀之疊石兮路  
畏纍而巍峩天雞號而夜半兮暎欲出於重波恍元幕  
之垂黑兮憎火輪之盪摩緬羲和之有御兮扶木暝其  
將華渺暘谷之不可以里兮屈高春其幾何嗟世寰之  
安在兮尚昧冥而未旦覩帝車之斜迤兮耿星宿於霄



漢漸島峙之翕鮮兮益莽茫而瀰漫恐闐闐之猶爾夢  
寐兮類蟄蟲之惛亂明乾極之牽掣兮儼機軸之翕張  
固陰泉之歛炯兮煥燿燧之奮颺煒跋烏之燿煇燦爛  
兮渴喙解羽藐以迭碣或有燭龍之燬炳熒昱兮熾額  
爛目頌其方驤懸燿鏡之熒灼炭熺兮鮫人泉客剗濯  
而有光振頰鼓之焱燿炫輝兮似若壁壘嶸嶸以前行  
指彩虹之抱戴珥璫兮璀璨燿爛繆綢緇皇想朱鳥之  
次舍軌度兮豁達蘭轅訶聞燿鋈乘寒滂潮水之傾倒

推盪兮散曉赧霞氣之輾輳彩章乃飛騰於寥廓兮竟  
瞋眦於混茫緊高抗乎氛曠兮僅啟明之獨爍歛遠麾  
之賡爍兮遽羣動之盡躍川后潛精而窟藏兮海童覩  
耀以犇愕鮫鼉揚鬚撥鬣以悠漾兮鴻鶴刷毛挾翅而  
陵薄莽瑯琊之躋臺兮泐鯨山而畫其燬也間羅浮之  
睨井兮混蜃穴而夜其爍也迅夸娥之杖策兮懼追逐  
而莫之跳遶也怒魯陽之揮戈兮怪盤礴之弗吾規襲  
也惟圭臬之可測兮奈隙駒之焉託恒鞠明而究踵兮

遂壯凋而老鑠昔聖賢之有法兮實蓋渾之同天矧煉  
石而凝質兮復斷鰲而鎮淵將渤澥之鑿竈兮淪谷底  
而迭燃抑崑崙之崛峙兮繞巖腹而互旋豈文身黑齒  
之俯邇所出兮貫裸壤以相連或崦嵫濛汜之遠壓所  
沒兮罄八國之窮壘歎嚴冰與颺雪兮曠古莽之鮮覺  
常眠惕重蒸與疊藝兮掀炎邱之毒瘴霾烟諒衆人之  
懵愜兮持蜂蟻之撲緣偉小兒之辨知兮雖睿哲而弗  
宣彼凡俗之多故兮遇曙朝而即竟誠旦晝之梏亡兮

嚮晦昏而暫定紛士學之攘爭兮集農商而斷迸淫末  
作以相資兮侈利心之百竅倘桑榆之不復滅沒兮盡  
奪時而力政願鬱儀之恒若溟滓兮庶保躬而固命器  
曉籌而催闢兮警宵柝而告靜信舉筴而豫知兮幸聞  
鐘而深省何觀瞻之不足兮重徙倚以盤桓光已通於  
一躍兮影奚候於三竿逮層溟之畢露兮屹東霍之巖  
巒念列仙之獨往兮扼羨門於波瀾劃孤嘯而陟降兮  
撤蒙部以欣歡顧秦越之邈不相及兮又焉論夫遠近

乎長安

禹穴賦

并序

元  
楊維禎

會稽山爲南鎮見周禮職方至於今祀典不廢人以  
不見禹貢爲疑禹貢書治水起止自揚州至於震澤  
故會稽與淞河皆不登載禹穴在會稽山見皇覽又  
見太史公書人以葬衣冠爲疑考帝少康封庶子於  
會稽以奉守禹之祀則禹穴在會稽無疑也真誥以  
禹醉鍾山而仙去此異說之謬也又以穴藏禹治水

秘策者尤謬故辨其說以爲賦

追太史之東遊兮躡夏后之巡踪過會稽之巨鎮兮登  
宛委之神峰曰羣聖之所棲兮闢陽明之洞府問東巡  
之故陵兮固已失其寔所繞古屋之雲氣兮瞻袞冕之  
穹窿雷霆掣夫鐵鎖兮梅之梁兮已龍秋空山其無人  
兮挂長松之落日枕荒草之阡眠兮棲專車之朽骨忽  
白日其有爛兮射五色之神晶窺神迹於一竇兮眩太  
陰之窈冥世以爲衣冠之壙兮神書之竇也圭璧出乎

耕土兮彼巨石者不可扣也曰玉匱之發書兮遽困淪  
而天飛賴餘策以汨鴻兮復韞櫝以秘之夫以四載之  
跋履兮亦云行其無事錫元圭以告成兮始龜文之來  
瑞何誕者之夸毗兮異九疇而不經使穴書之不洩兮  
夫豈汨陳其五行觀連天之巨石兮妙斧鑿之無痕南  
笥削乎其玉立兮東娥接其雷奔塗峰歸其西北兮執  
玉帛者萬億夫既遊而遂息兮吾又何疑乎窀穸綿祀  
典之常尊兮石豈泐乎一拳妄鍾山之金酒兮又何附

會於妖仙噫嘻南望蒼梧兮東上會稽九疑瀕洞兮窻  
石淒迷秦之望兮低徊悲沙邱兮不西客有醜酒荒宮  
而和之以歌曰稽之鎮兮南之邦紛萬國兮來梯航若  
有人兮東一方酌予菲兮薦予芳舞大夏兮象德詠東  
海兮西江

釣臺賦

并序

明宗臣

余聞嚴子陵釣臺舊矣丁巳秋余參藩赴閩取道兩  
越始登厥臺裴回焉商飈西來萬山颯搖我心傷悲



爰申厥詞把酒放歌白雲莽互豈君之聞歌而來哉  
恭承帝命以南邁兮弭吾節於富春儵微霜之隕百草  
兮何芳杜猶菲菲其襲人睇嚴陵之舊里兮釣臺鬱而  
嶙峋屯飄風其相薄兮吹石瀨之磷磷宿莽搖落而變  
衰兮余又安得問夫白蘋余又懷椒醕而噉臆兮蹇吾  
馬之逡巡而不前豈以沉淪之俗羈兮乃不得以揖高  
士而執鞭唯炎德之中天而興兮紛衆芳之雜糅以比  
肩何佳人之夸姣以抗行兮乃獨抱孤貞而自全袞冕

黼黻之元以章兮蓀獨愛夫羊裘歟鴻鵠之高翔兮聊  
寄吾跡於汀洲昔傳巖之版築兮武丁肖形以資厥猷  
非熊之協帝夢兮渭叟起而佐周何帝之手詔以抒悸  
兮羗獨偃蹇而夷猶故人之不忘舊懽兮情恍惚而至  
乎帝庭何帝腹遽以足加兮太史奏之以客星咄咄子  
陵之不肯爲理兮帝何獨惜夫沉冥蓀何高蹈而不顧  
兮乃長揖以謝夫天子朝發軔於漢宮兮夕稅駕於江  
汜有君如此其忍負兮蓀豈亡覩乎厥旨痛韓彭之竟

以烹醢兮勃何辜而卒不免乎美里念盛名奇績之不  
可以善終兮是用忍情而惜此蘭芷鳳凰之回翔而不  
肯下兮豈網羅之所能施使蛟龍可得而常服兮又何  
以卑牛馬而下之睇江河之趨下兮喟高風日逝而不  
可追撫故迹而連蜷兮悵吾生之獨後時往者既已不  
可復兮冀來者之猶可爲委余珮之陸離兮掛吾冠於  
南斗之墟擘長虹以爲衣兮拾青露以爲琚托微誠於  
浮雲兮蓀其攬瑤華而遲予望美人而不見兮羌獨立

以蹢躅亂曰維江有蘭美人植兮白雲茫茫歸何晏兮  
平楚落日怨青楓兮獨來乎山中吾與汝嬉以遊兮

烟雨樓賦

明彭輅

繁樓之構在彼湖中地選天造神摹鬼工塵囂永遯湫  
闌靡通超遙寂歷曠莽窺空滅忽縹緲杳靄曛曛非烟  
非雨氣常團縈恍含太始乍吐鴻蒙遠而望之若蓬壺  
之現高春也側而睇之若漣漪之擢芙蓉也崔嵬岬嶺  
若貝闕之薄青穹也了時特阻若孤雲之覆長虹也當

其氤鬱生烟汗液成雨頃刻渾沌高下迷處時則蛟螭  
噴踊天吳騰凌蜚廉屏翳詭譟信爭颺颺作嬉鼎圖斯  
徵馮夷踏舞水妃降升陽侯海若遞次主盟元珠失矣  
離謨眩驚衆形鏤彩萬彙韜凝乃其游人愴怳領蹙而  
怔忡傷去住之不易心泛泛如搖旌迴橈弭棹歡罷悲  
興蕭颯中路泊兮無營別有壯夫俠士隱於屠肆暱於  
博朋靡以窘懾靡以物撓豪宕慷儻意盛氣盈爲之奮  
趾而一登岸焉傲睨睚焉狂酲欽荆聶之懷德眇田竇

於流萍千金委爲芥礫一諾踐以捐生方擬躡幽晦躡  
沉冥耀闇沕撥艱屯干將躍以鳴嘯欣乎作解之堪乘  
也迨夫烟收雨霽杲朗暎鮮八垓若闢九紘若懸乾符  
坤紀彪炳恢宣春陽噓律熙熙詵詵冰融潦積坎溢而  
傳瀧奔瀨驚澗逗谷穿峽不能束澮不能涵淙淙湑湑  
潺潺濺濺混併而下於兩湖之水滉漾頌浩長雄於百  
川於時桃花匝蹊柳絮飄麓百卉盡菲艷紅薈綠入璠  
璣之林瓊琦充目得吳工之杼錦黼駢簇於是乎鐘鼎

世閥之家金穴素封之伍與夫洛誦章縫塵氓販賈相  
與駕棠舟溯極浦吹鳳簫擊鼉鼓呼雉盧羞雁鷺飲大  
白醉醇醑採芷蓀蘭掇芝擷杜結友貽芳少年爭附追  
愉快於良辰不知日之云暮間以游閒高遯灑脫騷人  
行葦施之野問匏葉之津據苔磯之石施甘餌之綸希  
龍伯之釣倣會稽之蹲魚鬣如阜鰲顱有神掀波跋浪  
發聲鱗鱗姑縱之使遠去恐三山之遂沉捨鰈鱣而不  
取羅魴鮪之巨鱗意不在獲其樂孔伸以狎漁父以陶

大鈞雖衡茅而桓褐歸於各適其真既而夕陽暝素月  
出蟾蜍纖玉兔疾爰有海上羣仙丹霞是籍辭王母而  
于邁御雲輶而來適九節靈壽之杖雙鳬尚方之舄翠  
旗金支旖旎曄奕元鶴紫鸞繽紛下集遵佳嶼而遲徊  
臨瑤臺而布席餐沆瀣之氣攬虛瀨之色吸望舒之晶  
偃玉壺之宅倏而龍驤倏而鴻沒星墮河隱祗餘奇蹟  
令人可慕可述而不可以即客有聞者具告於大愚叟  
叟曰有是哉仙人好樓舊有是言彼既脫屣人世邈爾



不闕而美景勝趣尚數數於其間况茲樓也介吳越之襟喉控全浙之上游卜神臯之爽塏分瀛渤之一洲聳大觀號浮丘者乎宜偃佺羨門之儔依依眷眷而踟躕少休也客曰今之勝猶昔之勝今之樓非昔之樓矣子知之乎叟曰何者客曰太守神智寬和致理蘊藉風流雅能吳語煥焉藻飾規度宏起限以欄楯節以階阼翼以層閣左右翬羽護以培堤蜿蜒若几芙蓉環植的皪霍靡點綴不煩湖山輝賁則士女之盤娛列真之徙倚

殆有其以今子徒閉門屏閭蓬蒿自蔽曷假丹鉛之暇  
一於茲而游豫乎曰予也無觴無瑟有足有屨興合神  
飛亦嘗戾止矣曰遊者如麋斐亶差池但業各有緒心  
各有思子之爲況何其叟曰夫子固陳朽之樗而山澤  
之癯耳家繫吾土異仲宣之旅羈也藝嗇雕龍乏子安  
之文辭也宦違天祿蔑揚子之燃藜也遭非鬻駿愧郭  
隗之權輿也予亦何情之有哉乃予之斯登也值杪秋  
之際草樹聿衰彫瘁黃落涼颼吹我袂白雲映我壑湛

湛兮冷冷兮浣炎區之盆濁吾嘉所不足者崇岡複嶺  
爲屏爲環爲髻爲索而茵墟褥甸溝塍綺錯綿聯農稼  
綢繆井落誠樂郊之腴隩而都會之疆郭也縱眸四眺  
萬里寥廓秋宇鏡澄江天漠漠元氣淋漓布護揮霍獨  
惜陸相之忠猷鴟夷之早見其人一逝而九京莫作碣  
石扶桑咫尺匪迨貫齒椎紆達於崇朝南北兩戒此爲  
中條神州有九表裏勿淆窪者窳藪突者嶢嶢如蟻斯  
垤如鳥斯巢俯視吾生蟻蠓鵠鵠緬憶千古無論大荒

之年結繩之代自羲皇以降草昧文明市朝屢改淵實  
邱虛滄成桑殆金人夜移銅駝昕壤歲序荏苒曾不我  
待錢鏐李昉今焉誰在惟是令名昭垂千載腐鼠自矜  
咄吁其怪予也幾絳縣之甲子襲角里之巾帶久矣委  
順乎天倪徜徉於事外嬰屯險其若夷被菜色而常泰  
既浮榮之靡加奚長生之足覲

釣臺賦

明  
王世貞

己巳之秋季月消魄余所偕邁者金華括蒼之伯指桐

廬下建德芊眠衣雲蟬緩繡壁飛湍激流千丈縹碧澄  
渟皎鏡下數白石於時鴻濛就冥鷁首忽辨桂輪少虧  
金波騰絢恍見一峯縹緲於空裔連岡溯流而拱獻森  
慘厭應巖阜回緬洪濤鼓兮木末流泉激兮石間中宮  
叶商拊節迴環余所停憩二客解顏舟子維焉此固嚴  
光先生灘也余乃野幘而楚服盤跚以前挹寒漿兮靡  
椒薦素琴兮無絃追夫一介之賤微靈誠感而燭天遂  
姓其州而貌其山者千五百年雲臺飈燼原陵無烟富

貴身盡聲華代遷孰與先生宇宙長鮮嗚呼噫嘻彼夫  
赤真中晦紫閨未窮兵起東郡節殉二龔庶幾君臣如  
日麗空妖新截蜃白水興龍藉非先生君德疇隆土行  
重倫邱貴驟穹萬歲千秋穆如清風絀纓拳珪以匏余  
躬再拜而退二客是從未既忽有歌聲起於蘆際天眇  
鏗厲林木盡沸其辭曰滄浪之清可以濯纓渭水釣利  
桐江釣名後心成迹強性之情孰與吾漁無後無強纖  
阿爲鈎太虛爲網冥志沕穆縱神滉朗余異而迫之不

見其處縹若一縷破東南霧而去

浙江觀潮賦

明  
黃宗義

吳公子過武林當八月十八日油壁接軫繡髻盈途員  
冠莪如大裙襜如士女皆觀潮而出城郭爲之空座主  
人謂公子曰此枚乘所謂怪異詭觀也盍與子偕往乎  
至則錦帳翠幙山韜路織歌吹沸天紅紫錯烏波影山  
光攬雜彩爲一色其時纖塵不起水平如鏡渡頭往來  
漁歌答應車牛方喘於轉轂畫鷁初間而下矧彼江干

之士女既不異鷗雁之翔沙而衆口之喧囂又何殊驚  
鵝之亂聽逮至審時定候日影已斜遙傳屢起中心搖  
搖恐陽侯之爽信萬目睽睽向海門而注視不戒而孚  
聲收息阻向之喧囂不定者忽然如含枚而楔齒雖絳  
縹之微響亦澄然其入耳俄而一線橫江天風颯然摩  
挲目睛指點雲烟瞻言百里之外已覺隱隱闐闐豈輦  
鼓之動地或殷雷之在天方潮之初發也浩渺之區浮  
天無岸竭淡淡而東來雖洶洶而弗叛及其兩山迫脇



沙潭中垠忽而受於拘束無所容其浩瀚卒中怒而山  
立庶太空之無絆天蓋撼動而欲移地輿震盪而似判  
吳山越山爲之低昂不已亦恐其流轉而互換魚龍失  
勢飛鳥驚竄乃有狡童僂子百十爲伍絳幘單衣馳騁  
波路持彩旗兮悠颺潮之神兮來何暮呈傀儡之妙戲  
羌逞能以相妬耕父來天吳赴支祁按節罔象負羽孰  
不爲之膽掉心寒彼且從容而沿泝已而潮上漁浦波  
澄如故主人曰廣陵之潮枚乘以素車白馬比之較之

吾浙真不足齒矣彼弄潮者亦天下之能事哉公子曰  
吁夫潮者天地之怒氣也天地方怒而以供俳優之戲  
是爲樂怒樂怒與樂哀等也昔蔡君謨有戒弄潮文子  
不知之乎而以風俗之陋者誇於四方也主人曰否否  
夫論事者考其原觀今者遡諸古昔越之敗吳習流二  
千人戈船三百艘浙江固習水戰之所也降而錢王射  
潮以强弩此較射於波濤乃謂致師於水府彼氣機之  
翕張夫誰受其痛苦投箭筈以三千不過中流之東楚

逮有宋之南遷也嘗以茲日水中講武殿司臨安金山  
澉浦水軍萬人巨舶千艫西興龍山兩岸如堵天子大  
閱簡別強弩分爲五陣中權是主舞刀握槊節以金鼓  
砲聲滿江五色齊舉烟收砲息其散如雨凡今之弄潮  
者賈勇售藝兵家規矩輕性命於鴻毛故能馮河而暴  
虎其亦霸國之餘風抑書生之陳腐所謂安不忘危而  
子乃以俳優侮之耶公子語塞而退

國朝

達蓬山海市賦

并序

黃宗羲

余登達蓬山望海山僧皆言春夏之交此地特多  
海市各舉所見與圖畫傳聞者絕異東坡在登州  
以歲晚得見爲奇然霜曉霧後往往遇之亦不必  
拘於春夏也信耳信目自有差別因次第其言而  
賦之

己酉之冬觀海達蓬山僧四五指點空濛曰濱海  
之地不一疑茲獨當夫神宮光怪發作亦何人而

不逢但稱登州之海市者猶不免於瞽瞍也余曰  
各言其狀僧本源曰其爲城也雉堞崔嵬麗譙暉  
暉三里七里勾股可攝於焉戎馬乘城蹀躞照白  
竊驪雨鬃風鬣儼烽火之宵明俄黑雲之將壓其  
爲樓也巉巖百尺神輸鬼巧綺窗朱瑣明星縈繞  
靈妃雜遝凭欄要眇其語可聞如臨粧曉有時而  
現爲黃幄重簷婀娜繡帶飄揚何采旄桂旗之陰  
擁茲特疊出以爲章汪道者曰亦有單門聚落忽

然而來屋瓦參差門戶洞開嗟朝烟之不起豈井  
臼之生埃固職方所不紀亦歷劫所不災僧續宗  
曰當旭日之初高有霜鐘之寓質制宏萬石音諧  
六律藏寂寞之元聲雖漏盈而不出少焉變爲城  
郭中引長橋見刺史之行部或中丞之入朝鳴笳  
列騶夾轂喧囂何珠宮貝闕之內而以鹵簿宣驕  
其後幻爲染肆綠沉紅淺羅綺繽紛借霞天以爲  
色蒸五綵而成文彼蜀江之濯錦信天人之攸分

補陀僧曰橘柚初黃颯然風葉覽觀大洋湧起寶  
塔四面勾欄七層鞞鞞華矚風濤光交目睫遇其  
變現狀若鸚螺瑣碎末品大越邱波歛閃之下湛  
然水波若夫海路壯濶一山千里雖人跡所不交  
亦鍼經之能指爾乃帆席未掛僧窗晏起忽然叢  
島逼塞孤峯魁峙疑天竺之飛來豈巨靈之乍徙  
當其電燿不煩螭晷名曰浮山海人習此或曰此  
何理也余曰夫積塊之間紅塵機巧菁華銷鑠猶

且羣羊飛鳥野馬磅礴彼大海空靈神明郭郭百  
色妖露豈能牢落故其軒豁呈露者窮奇極變而  
無有齟齬此固蛟龍之所不能專而天吳罔象之  
所不能作况蜃之爲物甚微其吐氣且更薄乎故  
南海謂之浮山東海謂之海市是乃方言之托也  
富春山賦

方士穎

錦峰拔地繡嶺排天星分斗牛之次域界吳越之  
偏遙爭奇於鳳嶠邇奪秀於龍蟾鎖江流而互折



環郡郭以迴旋爾乃蹟著巖陵名彰漢世居浙水  
之上游屈桐溪之邊際行百里兮縱橫複千重兮  
巨麗想俗境之斯懸疑仙靈之或閔而且源通迴  
輿徑入高冥峽將頽而未落崖既仄以還撐匿風  
雷於窅壑吞日月於危岑掛飛流則砰訇界道攢  
立石則率律穿雲至其變幻難名端倪莫測呈暝  
靄之千容獻晴嵐之萬色林颯颯兮濤翻澗淙淙  
兮雨集蒸霞則爛漫以紅酣染霧則微濛而翠濕

若夫天時遞易物候頻推鳥喧春於谷口蟬噪暑  
於崇隈巖未霜而幽芬綴菊塢初雪而瘦影凍梅  
夕照將收疊巘模糊而漸沒晨烟乍捲層巒歷亂  
以俱開下則有七里迴灘波澄碧瀏是曰佳泉傳  
之陸叟稽品第於茶經次南零乎十九停客舫之  
蘭橈試陶鑄而汲取上則有雲根對峙截業橫江  
巖君寄此託興滄浪曾披裘而釣雪且辟世以相  
羊拜遺祠於岫麓垂百代而猶芳復有崱嵫坡平

盈盈隔水古墓斯存碑題謝氏懷擊石之高歌歎  
流風其未已又有村依別岸數里通津中棲處士  
厥諡元英著詩名於唐室號里居以白雲維往跡  
之依稀與茲山爲遠近人即事而俱傳地因人而  
益勝洵隱遯之名區亦遊觀之別境故紀美於輿  
圖復標靈於志乘於是孤尋載榼靜討支筇擘烟  
蘿兮峻陟緣蘚石兮斜通矚千村於曠遠瞻四野  
於遙空古樹陰邊隱約露僧廬佛閣寒波渺處依

微飄賈舶漁艸窮向背以搜奇仿宗少文之逸趣極  
低昂而造險希謝靈運之高風爰作歌以舒其長嘯  
乃搔首而問乎蒼穹歌曰鬱彼神秀兮鎮我邦循厥  
端委兮亘且長蜿蜒奔逝兮抱澄江山川映發兮互為  
光振衣登厯兮神遠翔超然萬古兮遠蒼茫

七

七述

宋  
晁補之

予嘗獲侍於蘇公蘇公為予道杭之山川人物雄

秀奇麗夸靡饒阜名不能殫者且稱枚乘曹植  
七發七啓之文以為引物連類能究情狀退而深  
思倣其事為七述意者述公之言而非作也

眉山先生懷道含光陸沈於俗日與嵇阮賦詩飲酒談  
笑自足泊然若將終身焉於是潁川孺子聞而往從之  
躡屐擔簦披衣踵門及階而止望帷而稱曰不敏聞先  
生之誼敢侍於下風先生矍然驚曰孺子來吾惡夫世  
人之保我也久矣而不能使人之無我保則戶外之屨

滿焉將命歟吾無所逃此雖然孺子何為者也孺子曰  
幼而多治長而屢窮遭先生乎齟齬之途陪先生乎寂  
寥之事樂先生之所為樂者以白吾首其已乎先生啞  
然笑曰孺子上吾以樂而未嘗無以樂者順也羈旅於  
吾有時矣亦嘗聞杭之山川人物雄秀竒麗夸靡饒阜  
可樂者乎孺子曰先生不以不敏為難與言得聞咳唾  
之音不敏以為幸先生將何以教之先生曰杭之故封  
左浙江右具區北大海南天目萬川之所交會萬山之

所重複或瀨或湍或灣或淵或岐或孤或袞或連滔滔  
湯湯渾渾洋洋纍纍硤硤隆隆卽卽若金城天府之疆  
其民既庶而有餘既狡而多娛可導可疏可舫可桴可  
跋可踰可撝可車若九洲三山接乎人世之廬連延迤  
邐環二千里邑居牧聚蟻合蜂起高城附之如帶繞指  
隱以為脊折以為尾因河塹華不足方比方城漢水胡  
敢競美當昔夫差之盛時內姑蘇以為心腹而外城此  
以為身軀車千乘甲士萬人粟支十年帛散千屯灑汗

成雨連袂成雲乃有大夫伯嚭行人伍員之徒通其謀  
將軍孫武公子夫槩之徒用其衆嘗以國政之間發徒  
截江命習戰事於是張翠羽之蓋靡魚須之旂揚鵝足  
之楫曳龍尾之舟凌鱣黿之車戲賁獲之儔飄鼓吹乎  
下風隘戈矛乎上游乍往乍還乍後乍先若亂而若聯  
乍止乍馳乍合乍離迭唱而迭隨驚鮫人立馮夷清江  
忽兮怒濤颺風為之揚岐急而即次食其樂作三軍皆  
賀響震山壑其強如此故姑蘇恃以為南蔽而能驅唐



蔡蹂齊魯侵尋乎百粵隳突乎三楚棲句踐乎窮山鞭  
平王乎顏墓此亦天下之形勝也孺子欲聞乎孺子曰  
西河中流衛客之所能諫秦險百二亭長之所能入願  
先生廢此而語他先生曰吳越之有東南也實國於杭  
而杭吳越之大都也宮室之麗猶有存者其始也削山  
填谷叩石墾陸麗林誅樾擢篠夷竹旋緣阿邱憑附隈  
隩千夫運畚萬役供築增增硜硜坎坎碌碌前呼後和  
遠近相屬卑者起之以有餘高者損之以不足開曠朗

乎蒙密發瑰奇於潛伏然後工人之材陶人之瓦水輸  
陸運屬柁連輶縱橫錯落山積其下其成也翼翼鱗鱗  
勃鬱輪囷若化若神上據百尺之巔下俯億尋之津雙  
闕高張竄臨康莊門開房達乍陰乍陽中則複殿重樓  
砂版金鈎卑高仰俯下上明幽崢嶸巖薛鼎峙林列吐  
吞雲霧虧見日月宏規偉度古曠今絕旁則曲臺深閨  
碧檻朱扉鱗差闕限奕布棖題棋盤白鳳壁戲青猊溫  
風徐而吹坐寒雨沐以霑帷列屋而侍者則妖嬈艷姝

螭首冰膚清臚素齒既嫺而都乃服輕袿被華裳綴珠  
履揄鳴璫飾鉉英含若芳倩巧笑兮婉清揚縹緲兮如  
雛鸞之欲舞逍遙乎如飛雲之欲舉嬋姵婉孌變媚  
嫵流榮發色不可程度羽觴薦朱顏酡悲激楚妙陽阿  
詞曰陌上花開游女歸園南池北黃鸝飛曲房清閣夜  
更衣於是聞者恍然神揚意馳紛紛擾擾惑亂不怡此  
亦天下之雄觀殊樂也孺子欲聞乎孺子曰宮居閨處  
者寒燠之媒而疾癘之梯也且館娃成而麋鹿游願先

生廢此而語他先生曰杭故王都俗尚工巧家夸人鬪  
窮麗殫好紛拏錯糾晃蕩精晶若八方之民車湊舟會  
角富而衍寶木則花梨美樅栳柏香檀陽平陰秘外澤  
中堅以斬以刊以剗以剜以漆以膠以墨以丹為牀為  
甌為櫝為几為槃為匱為盂為簋嚴莊之佛慘烈之神  
詭怪之鬼頎姣之人塗以鉛英鏤以金文依以靈山乘  
以飛雲霞烟霧靄煥爛五采渠輸陸運投錢競買曾不  
若母猴木鳶三月而齊一日而敗衣則紈綾綺縠羅繡

縠絺輕明柔纖如玉如肌竹窗軋軋寒絲手撥春風一  
夜百花盡發其製而服也或袍或襪或紳或綸或緣或  
表或縫或欄或紫或纁或紺或殷嚴以奉祠褻以養安  
薄以却暑厚以禦寒以錫三軍以賚四國以供耳目之  
玩以備土木之飾曾不若窮邊絕漠不紡不絡衣狐而  
袖貉寶則珍琳珊瑚碼碯砮化之玉火化之珠琉  
璃之碗水精之盃紅黃白綠磊落滿櫝北商東賈百金  
不鬻沙河雨晴月照燈明席張案設左右煌熒遠而望

之奪人目精遺英棄屑羅貯箱列曾不若宋人之拙三年而一葉於是彫床易席地之野文衣後曳綈之儉玉杯鄙土銅之吸此亦天下之妙工絕巧也孺子欲聞乎孺子曰書云玩物喪志紂為象箸而箕子嘆願先生廢此而語他先生曰杭之為州負海帶山蓋東南美味之所聚焉水羞陸品不待賈而足肉則封獮貍豕置兔畋鹿山狸白額竹犬青尾鷓鴣鶴鷺鷓鴣鴈鷓鴣園鷄池鴨隴雉田鷄陵收水截頭駢尾列磔肩裂趾飛毛灑血魚

則鰻魴鱸鰕鱸鰕鰕鯉黃頰黑脊丹腮白齒江鱖之醢  
石首之羹或腊而枯或膾而生白鰻青鯊黃鰻黑鰻鮓  
魚花蛤車蛾淡菜蛙白肖鷄螺辛類芥鼎調甌飣牛脰  
貉囁果則枇杷楊桃橘櫟柰梨青梅黃柿紫栗烏棹溪  
菱江蘆田苽湖藕壤肥水美天下無有冒以黃蜜漬以  
白醪芳香脆潔析醒解疴菜則苕蒿茵陳紫蕨青萁韭  
畦芋區茭苴芹根藤花羞盤菊葉薦筍薑辛薤淡薺甘  
笋苦飴以姑蘇之粳薦以烏程之醴於以和五氣於以

資百體此亦天下飲食之珍也孺子欲聞乎孺子曰揚雄有云棄常珍而嗜異饌烏覩其識味也且養身而尚乎味味則愚以聖人為不如易牙願先生廢此而語他先生曰地不滿東南故八紘之水歸焉水之為物潤下作醎溟渤蕩波海門莫緘駸駸脉布溢於江潭老漚席資爨山者海豫章為船萬斛更載一船所受車數十兩黃頭多錢富不可倣士之頑鈍不耻者皆餌其無厭之賞譬如山深而獸至木茂而鳥往故能收亡命借廝養



連應高之交合周邱之黨以北與中國爭長則鹽之利也夫鹽者食穀之將五均賒貸幹在縣官僮法議籠不辦以完大農給費入助國計官與牢盆世擅其利民有盜鬻則鈇左趾沒入其器此為前古之所制嘗試觀乎江之濱葭葦不根淺草芸芸斥鹵無垠白花蘚文百里如雲鹽官千家匪柘匪麻匪漆匪茶規利乎泥沙蟻封蚓垤積土如截削剝刮不漏毛髮挾攜擔揭十步一蹶偷趨竊走遺筐弃缶塗關塞牖鼎釜雷吼皓然紛葩

豐不盈斗姑以漬螺蛤而適口曾不比夫縣官冶鐵如山析竹為盤熾火以燔淵壑為乾崢嶸嶸嶂成削律兀挾舒蕭勃烟氣涵出若滅若沒若亡若失乍疑鹽陽之神翳乎與羣蟲朝飛而蔽天日立呼起諾百夫齊作紛紜揮霍千竈就涸光芒閃爍璀璨磊落小星逆躍鱗鱗新倉斂貯堆藏如帛如糧國以是強神變鬼化刀貝齊價獨不美夫算菱芰魚蠮之殫細及下者哉諺曰千金之子不死於市又曰人富而仁義附焉此先王所以教

民知榮辱之時也孺子欲聞乎孺子曰猗氏之治智賢  
白圭而不監於道願先生廢此而語他先生曰江源所  
起濫觴之墟泓泓汪汪不漏不虛放而行之冒於川渠  
繚繞縈行左挾越右截吳以散以敷然後淫為大江以  
東合乎尾閭而潮生焉古今所論潮者日月伏見之所  
為也嘗讀渾天之說曰地浮水中天在水外水之消息  
垓北無際一闔一闢若開天地一呼一吸若出元氣其  
始來也若毛若線若帶若練堂堂沓沓合聚離散須臾

之間千化萬變其少進也敲磕鏗砢石號木鳴越岸包  
陵在谷滿谷在坑滿坑其為氣也或煦或呀或噫或噦  
瀾茫炭漫澎淖沸渭湏洞滉漾渤潏滂沛涵澹淋滲漣  
澌淫泄跳珠湧沫百里紛會沃焦蕩胸汨母陵背縱橫  
絡繹飄忽爭逝徐則按行緩則就隊連氛累稜陽景朝  
昧周天而旋踰八萬里不知其所憩於時元冥收威海  
若振吼千溪萃立萬浦却走絕維推軸神母不守左驅  
天吳右拂九首淵客拒扉冰夷潛牖江神海狶絕脰傷

肘陽侯馬銜顛蹶前後其為象也則紛紜參差萬頃一  
迹禹不能知契不能識承光露怪不復潛匿或馱而蹄  
或森而戟或美而殪或張而翼洶湧而奔以沃海門若  
土囊風怒驅屯雲辟易而征以擊西陵如井陘戰酣出  
奇兵宛兮改容若蓐收素服駕白龍忽兮當前如歸虛  
泛溢浮五山一北一追一僨一起突然而逝餘勇未已  
於時吳兒獠工引檣掛席鐃鳴鼓動去若飛鷁風止雨  
息江清海碧此潮之大凡也傳曰上善若水又曰水幾

於道故古之人見大水必觀善利萬物似仁不畏彊似  
勇能方能圓似智萬折必東似信若是者孺子欲聞乎  
孺子曰幾矣先生之所陳五事之上也姑欲聞其深於  
此者先生曰西湖之深北山之幽可舫可舟可巢可樓  
與鷗鳥居與鹿豕遊漁蓑山屐烟雲悠悠寂寥長往可  
以忘憂風衫塵袂京洛何求不如西湖瀕不如北山阿  
白蘋綠芰紫柏青蘿反裘坐釣散髮行歌人生安樂孰  
知其他茫洋以為柳溪盤旋以為李谷卷軻辨乎三尺

之喙擴夷隘乎十圍之腹此古君子所以藏器於身待時而動也傳曰不怨天不尤人蓋優哉游哉聊以卒歲若是何如孺子竦然離席而言曰蓋聞達人不忘身而先立志士不貪財而後義隱之所尚得全於天也孺子不敏乃今得聞出處之際敬再拜受教

七觀

宋  
王應麟

東野先生弰光環堵根極深寧慕白賁以息影玩素履以洗心有南州公子儼然踏門言曰切懷太史公之志

廣覽四方之恢詭譎怪升高能賦山川能說庶幾一二  
於君子之九能今至是邦也願啟我以偉觀博我以奇  
概先生曰予臥遊詩書之園眎不踰几席敢誦舊聞吾  
子自擇焉昔嘗窺宛委之簡見神禹之山經東有山曰  
句餘實維四明南有建德之國空同之仙公子曰愚行  
天下睹終南嵩岱之高興公登陸徧矣先生曰觀於海  
者難為水駕言徂東浩漾滄溟羲和浴於搏桑日杲采  
兮金鉦朝潮夕汐與月虧盈有鱗如山從以鯢鯨神虬



襄首吐雷噓雲方其駿濤虎浪之興銀峰萬仞雪屋千  
層簸空兀嶽沃日吞江雷公為之矍矍天杭為之盪震  
盧賦竇志未能該也穆之圖論目擊其真天門之水灌  
泝潤灋灋汨汨遠注析木三吳轉粟粲粲粒玉饑甿  
仰哺檣連尾屬負舶迅舸蠻縵夷琛東泊青徼南薄朱  
垠登山而望渺渺鷗鷺之浮天根候五兩以颿颿爰居  
戢而激氛雕題卉服駢貊雞林揚柁東門艤鷁江濬爰  
有狻猊犀象翠羽火齊薇水龍鱗之馥郁蠙珠木難之

瓌麗杜揚所未編辛文不能計世道宸隆如濤降升蓋  
獻龜於明者治之兆雨毛於鄮者亂之萌在昔句踐疆  
宇至鄞仰瞻沼吳蒲羸之濱曰甬句東浹口外洲戰爭  
蟻穴興亡貉邱秦政騁欲狼心未滿游鄮踰月從流忘  
反海水羣飛洪荼於民一瞬為墟鮑車魚罾逮漢六葉  
濯征東粵句章出師命臣韓說典午末造妖寇鷗張裕  
以豪英往戍句章唐季不綱盜覆此城巨容筒箭獲醜  
策勲想霸諸夏吞六王之雄圖螭舟兕楫射蛟之弧殿

殿闐闐愴陽侯駭天吳矯矯三將如熊如羆電矛雨矢  
櫛刈攘除威殫勢遷鮒入鯢居昆明幾劫桑田半蕪吾  
將放其遺躅既堙沒而無餘矣建炎凱獻於高橋六飛  
安行於海濱隱士相如掄忠納說何懋賞之濇濇豈亦  
若赤城三老之縹緲覲千古以永愜澹東波之無窮誦  
往聖之緒言塞乘槎其焉從壯魯連之高蹈閔精衛之  
深衷子好游乎公子曰水至平端不傾心術如此象聖  
人不在險也請更端以教先生曰海物惟錯雋味崱馬

任公垂餌便嬖揄竿波臣效異鱗萬介千寸結腹蟹亭  
以螭名漢律獻醬惟遠見珍蚶菜疲民君嚴奏免貢纔  
鰓骨元豐仁儉鯊鰲蚌蛤鰲鰓鰓鰓首石齒鋸赤尾比  
目續品類之數百愉茂安之慘蹙陔市攸聚水族有簿  
兼韓子之南烹藹鱉蠔與章柱雖石華海月之詩綺貝  
繡螺之賦弗能殫舉東甌之鰓邪頭之鮓潘國之鮓且  
甌之蜃珠鰲紫紱其來如雨鰓劔鰓蟻數以盆鼓於是  
擊鮮鼎食羞用膳經嘯父蝦鯊宣子魚餐陳登之鱠虞

棕之鯖芼以秋菰醑以冬橙拔苔髮以為蕪醉鰲杯而  
未醒若乃潤下作鹹散鹽為貴宿沙肇鬻而海王之策  
祈望之守昉於齊而征利漢郡設官三十有六會稽則  
海鹽居一此三縣猶未置也考諸唐志鄮始有監晏巽  
管榷法寢以嚴海濱稚耄弗能苦淡若作和鬻甘者齏  
醢酌醴燔枯鱗鮑恣啖繇是亭監暴布牢盆歲增負塗  
山積熬素雪凝剪竹葦以供煬釋耒耨而肆勤一畝三  
斛川浮陸馳行商通其僨巡院譏其私蓋日用飲食不

可以無朝齏箠裏其功與醯醬俱馬齒水精氷鏤霜明  
古云食穀之將詎屑玉而噉瓊東箭落出越竹筍萌楊  
氏之果染霞垂星鹽為夏槁屏羶撤腥飫高裴之菜食  
奚猗氏之足云魚鹽之輶民殷財阜不謂之樂郊耶公  
子曰海加租魚不出鹽頗利而人窮怨不聞蕭望之朱  
文季之言與吾冬饘夏菹藜羹不糝味無味夫何慊願  
聞所以利民者先生曰先民有夏盡力溝洫魏之豹起  
漢之倪白疏泉灑流沕漚膏澤維鄧之邑厥壤鹵舄原

高隰下易曠以溢相時鍾洩守宰迫職我懷休明循吏  
輩出幹造化機卷舒神術有豐無窶潦霽惟一觀乎句  
章漢陂之舊內史修復所居民富言觀乎南湖曰小江  
溉田置堰元暉氏王蘭鞠無絕如古桐鄉觀乎西南堰  
曰仲夏頃凡數千雨我多稼築者季友惠以厚下湖有  
廣德實在西界刺史曰侗增修勿壞夷庚起隄岫也逮  
逮誰其填闕利微害大發議請復志不克遂唐有西湖  
爰在東郊陸令開廣農殖嘉苗湖姓以錢亦處東鄙受

溪七十二環塘八十里四牖七隄重治者李漈漈清渠  
有莼有苽有蒲菡萏煙海雁鳬蓋自晉以來遇川水種  
既浸既潤民食無乏介甫鳴弦乃隄乃陂瘠土衍沃遺  
黎之恩吏隨以窳棄稷弗務新溝之歌靡聞均水久廢  
莫舉畊澮塞而圻龜坊庸圯而涸鮒曩晦一鍾今食二  
釜孰能諗夫愛民者塗之人可以為禹公子曰佐耕以  
水展也民利思不出位吾將有俟欲聞宏大絕特之觀  
無隱乎爾先生曰明多名山竺乾氏居之寶地金繩祖



花禪枝南有雪竇東有太白飛瀑淙淙層巒巖巖大梅  
之巉崿衣荷餐松之詠澹如也玉几之岸客神耀得道  
之銘炳如也吳氏子真松風隱居陳蹟故在是邪非歟  
文正之詩大年希白之筆釋子之所夸詡存乎否乎雖  
然著本論者惡其學幻而言咙意者避世之士晞髮濯  
纓岑蔚林密魚潛龜藏思昔山人有徐廣孝經之指王  
蔣顧三隱席珍韞璞不斲流俗之知己璜也自謂似龐  
蘊僧騰客之該瞻父老稱美今嵯岬之下豈無草耕木

茹匪黃匪紫蟬蛻囂滓欲往從之耄且休矣子謂斯何  
公子曰姑舍是側聞是邦鴻生碩德所治教也南豐曾  
輦東南星斗之望牧於斯忠肅陳公雪竹霜柏之操貳  
於斯船司空則以道之鼃倉庾氏則子約之呂正學參  
前修姱節映終古前代令有琯長史有吉甫未足數也  
文獻濡染必有聞而知之者敬在下風先生曰明士鄉  
也有越大夫種之英風其人通達而多能有大里黃公  
之高標其人恬靜而自珍董子以孝行著愛親者式其

儀型任奕以文章進摘藻者襲其芬馨宏雲光修四士  
尚義挹其勁操思特立以獨行故虞仲翔以俊異之生  
為海嶽之精陸士龍因吏民之謹知禮教之明屯艱否  
閉堙曖湛冥宋以文治賢路恢弘丘樊緼褐化為紳纓  
邑校求師再書延致斯廣川之淵源也順昌嬰孺以俞  
為字斯新息之慈仁也孝通神明凱風終養斯朱康叔  
之純誠也引裾強諫辛毗其直鉤黨掛名范滂自出臨  
難盡節解揚之匹石交歲寒之死不渝信義如漢脂習

卻賈胡之賻持玉雪之廉父子如魏胡質之人也編典  
錄而無媿令譽焯乎日星下逮里巷則有旌閭之楊掌  
庫之童若兔置中林之好德菌薈一時之榮華荃茅萬  
世之淑慝彼鍾黃之竊據郡乘幾於曲筆先生言未既  
公子起而稱曰鄭圃澤多賢衛多君子魯東海多卿相  
汝穎多奇士居使然也盍語其詳先生曰世族嬋嫣重  
圭累組位槐調鼎宅揆惟五袞鉞焜耀乎宗翰衡樞舄  
奕乎該輔牙纛畫繡差肩踵武紫艾紛綸常伯亞旅庠

聲序音洋洋鄒魯習鄉上齒長少有序流品別渭涇公卿列韋布俎豆秩秩章縫楚楚凡周之士亦世吾州之俗近古春秋二高之說詩禮曹鄭之詁殊科首登於蓬萊掄魁三冠於龍虎名茅廬仕多桂竇桐韓之疊矩又有文章授訣孝弟彙聚瀟山清篇武子妙句潛虛有辨杜集有注家自以為舒向人自以為揚馬茲可以言文獻乎公子曰媿則媿矣然世祿非不朽科舉外有學願識其大者先生曰故國下車喬木蒼蒼理義雨露名節

風霜古之遺直曰豐清敏排姦詆奄讜論廩廩託興荷  
花聞者斂衽慶歷師儒燕及孫曾曰樓宣獻斯文統盟  
有德有言既和且清泗沂絕學闡自濂洛朱張呂子緒  
承先覺臨川二陸自得於心若異而同為已功深淳熙  
四儒探蹟性淵並游三先生之門獨契陸子之心傳處  
則靜貫以淑艾仕則善教以昌言長庚曉月惟楊繼袁  
袁亦有子受業於楊進禮退義家學用光春木芑兮高  
山仰止人固亡而書存世未遠而道邇顏何人哉希之

則是若昔魯廬江贊名德先賢沛三輔序耆舊節士後  
有作者孰謂知管晏而已公子肅然改容離席而拜曰  
廣哉觀乎井鼃甕蟻昭然開明乃知西河俗美以子夏  
北海風移由康成文藝抑末歸根六經滌源雖本敬義  
明誠鄉黨之化漢學是崇讀書尚友作聖之功闕里近  
只遵海而東從羣叟兮問途貫今古兮心同

浙江通志卷二百七十

欽定四庫全書

史部

浙江通志卷二百七十二

詳校官給事中臣戴璐

檢討臣德生覆勘

總校官編修臣倉聖脉

校對官助教臣胡子襄

謄錄貢生臣王時發



欽定四庫全書

浙江通志卷二百七十一

藝文 十三

詩 五言古

遊赤石進帆海

宋 謝靈運

首夏猶清和芳草亦未歇  
水宿淹晨暮陰霞屢興沒  
周覽倦瀛壖況乃凌窮髮  
川后時安流天吳靜不發  
揚帆采石華挂席拾海月  
溟漲無端倪虛舟有超越  
仲連輕

齊組子年戀魏闕矜名道不足適已物可忽請附任公  
言終然謝天伐

於南山往北山經湖中瞻眺

宋 謝靈運

朝旦發陽崖景落憇陰峯舍身眺迴渚停策倚茂松側  
徑既窈窕環洲亦玲瓏俛眎喬木杪仰瞻大壑瀟石橫  
水分流林密蹊絕踪解作竟何感升長亦丰容初篁苞  
綠籜新蒲含紫茸海鷗戲春岸天雞弄和風撫化心無  
厭覽物眷彌重不惜去人遠但恨莫與同孤遊非情歎

賞廢理難通

癸歸瀨三瀑布望雨溪

宋 謝靈運

我行乘日垂放舟候月圓  
泳江免風濤涉情弄漪漣  
積石竦兩溪飛泉倒三山  
亦既窮登陟荒靄橫目前  
窺巖不睹景披林豈見天  
陽烏尚傾翰幽篁未爲遭  
遐退尋平常時安知巢穴難  
風雨非攸悵擁志誰與宣  
倘有同枝條此日即千年

永嘉郡東望溟海

宋 謝靈運

開春獻初歲白日出悠悠蕩志將愉樂瞰海庶忘憂策  
馬步蘭臯縹控息椒邱采蕙遵大薄蹇若履長洲白花  
皜陽林紫囂曩春流非徒不弭忘覽物情彌道萱蘇始  
無慰寂寞終可求

初去永嘉郡

宋謝靈運

彭薛裁知耻貢公未遺榮或可優貪競豈足稱達生伊  
予秉微尚拙訥謝浮名廬園當栖巖卑位代躬耕顧已  
雖自許心迹猶未并無庸方周任有疾象長卿畢娶類

尚子薄遊似邴生恭承古人意促裝返柴荆牽絲及元  
興解龜在景平負心二十載於今廢將迎理棹過還期  
遵渚驚修垞溯溪終水涉登嶺始山行野曠沙岸淨天  
高秋月明憇石挹飛泉攀林塞落英戰勝懼者肥鑒止  
流歸停即是義唐化獲我擊壤情

吳興黃浦亭庾郎中別

宋 鮑 照

風起洲渚亂雲上日無輝連山渺烟霧長波迴難依旅  
鴈方南過浮客未西歸已經江海別復與親婣違奔景

易以窮離袖安可揮懽觴爲悲酌歌服成泣衣溫念終  
不渝藻志遠存追役人多牽滯顧路慙奮飛昧心附遠  
翰炯言藏佩章

自礪山東望震澤

宋 鮑照

瀾漫潭洞波合沓崿嶂雲漲島遠不測岡澗近難分幽  
篁愁暮見思鳥傷夕聞以此藉沉疴栖跡別人羣結言  
非盡書有念豈敷文

從庾郎中園山石室

宋 鮑照

荒塗趨山楹層崖隱靈室岡澗紛縈抱林嶂杳重密昏  
昏磴路深活活梁水疾幽隅秉書燭地墉窺朝日怪石  
似龍章瑕壁麗錦質洞庭安可窺漏井終不溢沉空絕  
景聲崩危坐驚慄神化豈有方妙象竟無述至哉鍊玉  
人處此長自畢

贈吳均

梁  
柳 惲

寒雲晦滄洲奔潮溢南浦相思白露亭永望秋風渚心  
知別路長不謂若燕楚關侯日遼絕何因附行旅願作

野飛鳥飄然自輕舉

迎柳吳興道中

梁  
吳均

團團日西靡客念已蹉跎長風倒危葉輕練網寒波白  
雲光采麗青山意氣多所言飽恩德忘我北山羅

同柳吳興烏亭集送柳舍人

梁  
吳均

河陽一悵望南浦送將歸雲山離曖曖花霧共依霏流  
連反舌弄下上渚禽飛桂舟無掩柂玉軫有離徽願君  
嗣蘭桂時拂東臯薇



同柳吳興何山

梁  
吳均

王孫重離別置酒倦峯畿逶迤川上草參差澗裏薇輕  
雲紉遠岫細雨沐山衣簷端水禽息窻上野螢飛君隨  
綠波遠我逐清風歸

采藥大布山

梁  
吳均

我本此山北緣澗采山麻九莖日返照三葉長生花可  
以蠲憂疾聊持駐景斜景斜不可駐年來果如漚安得  
崑崙山偃蹇樹三株三株樹如芟絳葉凌朱臺玉壺白

鳳肺金鼎青龍胎韓終及王子何代無仙才安期儻欲  
顧相見在蓬萊

別夏侯故鄣

梁  
吳均

白馬黃金羈青驪紫絲鞵新知關山別故人河梁送置  
此一函書爲子達雲夢

富陽浦口和朗上人

梁  
何遜

客心愁日暮徙倚空望歸山烟斂樹色江水映霞輝獨  
鶴凌空逝雙鳬出浪飛故鄉千餘里茲夕寒無衣

上虞鄉亭觀濤

梁  
劉孝綽

昔予筮賓始衣冠仕洛陽無貲祇有任一命忝爲郎再  
踐神仙側三入崇賢坊東朝禮髦俊虛薄廁賢良遊談  
侍名理搦管創文章引籍陪下膳橫經忝上庠誰謂服  
事淺契濶變炎涼一朝謬爲吏結綬去承光烹鮮徒可  
習治民終未長化雞仰季智馴雉推仲康此城臨夏穴  
楠植茂筠篁孝碑黃絹女神濤白鷺翔遨遊佳可望釋  
事上川梁秋江凍雨絕返景照移塘纖羅殊未動駭水

忽如湯乍出連山合時如高蓋張漂沙黃沫聚碧石素  
波揚榜人不敢唱舟子詎能航離家復臨水眷言思故  
鄉中來不可制奕奕苦人腸汴汭若無阻謝病返清漳

入若耶溪

梁王籍

餘艖何汎汎空水共悠悠陰霞生遠岫陽景逐回流蟬  
噪林逾靜鳥鳴山更幽此地動歸念長年悲倦遊

登天台山

梁李巨仁

台山稱地鎮千仞上凌霄雲開金闕迴霧暗石梁遙翠

微橫鳥道珠澗入星橋風急清溪晚霞起赤城朝寓目  
幽棲地駕言逸綺季避世桃源士忘情漆園吏抽簪傲  
九辟脫屣輕千駟沈冥負俗心瀟灑凌雲意蒼蒼聳極  
天伏眺盡山川疊峯如積浪分崖若斷烟淺深聞過渡  
輕重聽飛泉採藥逢三島尋真值九仙藏書凡幾代看  
博已經年逝將追羽客千載一來旋

黃蘗洞

梁  
江 淹

長望竟何極閩雲連越邊南州饒竒怪赤縣多雲仙金

峯各蔽日銅石共臨天  
陽岫照鸞采陰谿噴龍泉  
殘磯十代木  
廬翠萬古烟  
禽鳴丹壁上  
猿嘯青崖間  
秦皇慕  
隱淪漢武願  
長年昔負雄  
豪威棄劍  
藏名山況  
我葵藿  
志松木  
橫眼前  
所願同  
游好  
臨風  
載悠然

罷古鄆縣

陳陰鏗

秩滿三秋暮舟虛一水濱  
漫漫遵故道悽悽對別津  
晨風下散葉岐路起飛塵  
長岑舊知遠萊蕪本自貧  
被裏恒客吏正朝不繫民  
惟當有一犢留持贈後人

浣紗篇贈陸上人

唐  
宋之問

越女顏如花  
越王聞浣紗  
國微不自寵  
獻作吳宮娃  
山數半潛匿  
苧蘿更蒙遮  
一行霸句踐  
再笑傾夫差  
艷色奪人目  
數噸亦相誇  
一朝還舊都  
靚粧尋若耶  
鳥驚入松網  
魚畏沉荷花  
始覺冶容妄  
方悟羣心邪  
欽子秉幽意  
世人共稱嗟  
願言托君懷  
倘類蓬生麻  
家住雷門曲  
高閣凌飛霞  
淋漓翠羽帳  
旖旎綵雲車  
春風艷楚舞  
秋月纏胡笳  
自昔專嬌愛  
襲玩惟矜奢  
達本知空寂  
棄彼

猶泥沙永割偏執性自長薰修茅攜妾不障道來止妾  
西家

景龍四年春祠海

唐  
宋之問

肅事祠春溟宵齋洗塵慮雞鳴見日出鷺下驚濤驚地  
濶八荒近天回百川澍筵端接空曲目外惟雰雰暖氣  
物象來周遊晦明互致牲匪元享禋滌期靈煦的的波  
際禽沄沄島間樹安期今何在方丈蔑尋路仙事與世  
隔冥搜徒已屢四明背羣山遺老莫辨處撫中良自慨



弱齡忝恩遇三入文史林兩拜神仙署雖嘆出關遠始知臨海趣賞來空自多理勝孰能喻留楫竟何待徙倚忽云暮

宿雲門寺

唐  
宋之問

雲門若邪裏泛鷁路纔通黃緣綠篠岸遂得青蓮宮天香衆壑滿夜梵前山空漾漾潭際月颼颼杉上風茲焉多嘉遯數子今莫同鳳歸慨處士鹿化聞仙公樵路鄭州北舉井阿巖東永夜豈云寐曙華忽蔥蘢谷鳥嘯尚

湓源桃驚未紅再來期春暮當造林端窮庶幾蹤謝客  
開山投剡中

郡宅中齋

唐  
宋之問

郡宅枕層嶺春湖繞芳甸雲霓出萬家臥覽皆已徧  
漁商汗成雨解邑明若練越俗鏡中行夏祠雲表見  
茲都洵盤鬱英遠常棲眄王子事黃老獨樂恣遊衍  
謝公念蒼生同憂感推薦靈越多秀士運濶無由面  
神理翳青山風流滿黃卷揆予謬承獎自昔從纓弁  
瑤水執仙羈

金閨負時選晨趨博望苑夜直明光殿一朝罷臺閣萬  
里違鄉縣風土足慰心況悅年芳變淮廩佇滋實沂歌  
非所羨訟寢歸四明齡頽親九轉微尚本江海少留豈  
交戰惟餘後凋色竊比東南箭

登東陽沈隱侯八詠樓

唐  
崔融

旦登西北樓樓峻石墉厚宛生長定嵐俯壓三江口排  
堦銜鳥衡交疏過牛斗左右會稽鎮出入具區數越巖  
森其前浙江漫其後此地實東陽由來山水鄉隱侯有

遺詠落簡尚餘芳  
具物昔未改斯人  
今已亡粵余忝藩  
左束髮事文場  
悵不見夫子神期  
遙相望

夜泊越州逢北使

唐  
沈佺期

天地降雷雨放逐還故都  
重以風潮事年月戒回艫  
容顏荒外老心想域中愚  
憇泊在茲夜炎雲逐斗樞  
颺颺縈海若霹靂耿天吳  
鰲抃羣島失鯨吞衆流輸  
偶逢京華使握手淚相濡  
饑共嗜齊棗眠共席秦蒲  
既北思攸躋將南睿所圖  
往來固無咎何忽憚前桴

嚴陵祠

唐  
洪子興

漢主召子陵歸宿洛陽殿客星今安在隱迹猶可見水  
石空潺湲松篁尚葱蒨岸深翠陰合川迴白雲徧幽徑  
滋蕪沒荒祠暮霜霰垂釣想遺芳掇蘋羞野薦高風激  
終古語理忘榮賤方驗道可尊山林情不變

和登會稽山

唐  
孫逖

稽山碧湖上勢入東溟近烟景畫清明九峯爭隱嶙望  
中厭朱紱俗內探元牝野老聽鳴騶山童擁行軫仙花

寒未落古蔓柔堪引竹磳入山多松崖向天迴雲從海  
天去日就江村隕能賦邱嘗聞和歌參不敏冥搜信沖  
漠多士期標準願奉濯纓心長謠反招隱

送楊法曹按括州

唐孫逖

東海天台山南方縉雲驛溪澄問吏隱巖險煩登陟潭  
壑隨星使軒車繞春色儻尋琪樹人爲報長相憶

杭州北郭戴氏荷池送侯愉

唐崔國輔

秋近萬物肅況當臨水時折花贈歸客離緒斷荷絲誰

謂江國永故人感在茲道存過北郭情極望東菑喬木  
故國意鳴蟬窮巷悲扁舟竟何待中路每遲遲

送縉雲苗太守

唐  
王維

手疏謝明主腰章爲長吏方從會稽邸更發汝南騎按  
節下松陽清江響饒吹露冕見三吳方知百城貴

泛若耶溪

唐  
丘爲

結廬若耶溪左右若耶水無日不釣魚有時向城市溪  
中水流急渡口水流寬每得樵風便往來殊不難一川

草長綠四時那得辨短褐衣妻兒餘糧及雞犬日暮鳥  
雀稀稚子呼牛歸住處無鄰里柴門獨掩扉

酬綦母校書夢耶溪見贈之作

唐 諸光義

校文在仙掖每有滄洲心況以北窗下夢遊清溪陰春  
看湖水漫夜入廻塘深往往纜垂葛出舟望前林山人  
松下飯釣客蘆中吟小隱何足貴長年固可尋還車首  
東道惠言若黃金以我採薇意傳之天姥吟

送歐陽會稽之任

唐 王昌齡



懷祿貴心賞東流水長官移會稽郡地邇上虞鄉緩  
帶屏紛雜漁舟臨訟堂逶迤迴溪趣猿嘯飛鳥行萬室  
霽朝雨千峯迎夕陽輝輝遠洲映曖曖澄湖光白髮有  
高士青春期上皇應須枉車歇爲我訪荷裳

宿天竺寺

唐  
陶翰

松栢亂巖口山西微徑通天開一峯見宮闕生虛空正  
殿倚霞壁千樓標石叢夜來猿鳥靜鐘梵響雲中岑翠  
映湖月泉聲亂溪風心超諸境外了與懸解同明發惟

改視朝日長崖東湖色濃蕩漾海光漸曛曛葛仙跡尚在許氏道猶崇獨往古來事幽懷期二公

遊天竺寺

唐  
崔顥

晨登天竺山山殿朝陽曉厓泉爭噴薄江岫相縈繞直上孤頂高平看衆峰小南州十二月地暖冰雪少青翠滿寒山藤蘿覆冬沼花龕瀑布側青壓石林杪鳴鐘集人天施鉢謝猿鳥洗意歸清淨澄心悟凡了始知世上人萬物一何擾

謝陸處士杼山折青桂花見寄之作

唐

顏真卿

羣子遊杼山山寒桂花白綠萼含素萼采折自逋客忽  
枉巖中詩芳香潤金石全高南越壺豈謝東堂策會慙  
名山期從君恣幽覲

贈僧皎然

唐

顏真卿

秋意西山多別岑縈左次繕亭歷三癸趾趾鄰什寺元  
化隱靈跡始君啟高致誅榛養翹楚鞭草埋芳穗俯砌  
披水容逼天掃峰翠境新耳目換物遠風塵異倚石忘

世情援雲得真意嘉林幸勿翦禪侶欣可庇衛法大臣  
過佐遊羣英萃龍池護清激虎節到深邃徒想嶮頂期  
于今沒遺記

登江中孤嶼贈白雲先生王迴

唐  
孟浩然

悠悠清江水水落沙嶼出回潭石下深綠篠岸旁密鮫  
人潛不見漁父歌自逸憶與君別時泛舟如昨日夕陽  
開返照中坐興非一南望鹿門山歸來恨如失

將適天台留別臨安李主簿

唐  
孟浩然

枳棘君尚棲匏瓜吾豈繫念離當夏首漂泊指炎裔江  
海非墮游田園失歸計定山既早發漁浦亦宵濟泛泛  
隨波瀾行行任艫柂故林日已遠林木坐成翳羽人在  
丹邱吾亦從此逝

早發漁浦潭

唐  
孟浩然

東旭早光芒渚禽已驚聒臥聞漁浦口橈聲暗相撥日  
出氣象分始知江湖濶美人常宴起照影弄流沫飲水  
畏驚猿祭魚時見獺舟行自無悶況值晴景豁

經七里灘

唐  
孟浩然

予奉垂堂誠千金非所輕爲多山水樂頗作泛舟行五  
嶽追向子三湘弔屈平湖經洞庭濶江入新安清復聞  
嚴陵瀨乃在茲湍路疊嶂數百里沿洄非一趣彩翠相  
氛氲別流亂奔注釣磯平可坐苔磴滑難步猿飲石下  
潭鳥還日邊樹觀竒恨來晚倚樅惜將暮揮手弄潺湲  
從茲洗塵慮

雲門寺西六七里聞符公蘭若最幽與薛八同往

唐

孟浩然

謂余獨迷方逢子亦在野  
結交指松柏問法尋蘭若  
小溪劣容舟怪石屢驚馬  
所居最幽絕所住皆靜者  
雲簇興座隅天空落堦下  
上人亦何聞塵念都已捨  
四禪合真如一切是虛假  
願承甘露潤喜得東風灑  
依止託山門誰能效邱也

越中逢天台太乙子

唐

孟浩然

仙穴逢羽人停驢向前拜  
問余涉風水何處遠行邁  
登

陸尋天台順流下吳會茲山夙所尚安得問靈怪上逼  
青天高俯臨滄海大雞鳴見日出常覲仙人旆往來赤  
城中逍遙白雲外莓苔異人間瀑布當空界福庭長自  
然華頂舊稱最永此從之遊何當濟所屈

送崔十二遊天竺寺

唐李 白

還聞天竺寺夢想懷東越每年海樹霜桂子落秋月送  
君遊此地已屬流芳歇待我來歲行相隨浮溟渤

同友人舟行遊台越作

唐李 白



楚臣傷江楓謝客拾海月懷沙去瀟湘挂席泛溟渤蹇  
予訪前跡獨往造窮髮古人不可攀去若浮雲沒願言  
弄倒影從此鍊真骨華頂窺絕溟蓬壺望超忽不知青  
春度但怪綠芳歇空持釣鰲心從此謝魏闕

天台曉望

唐  
李 白

天台鄰四明華頂高百越門標赤城霞樓栖蒼島月憑  
高登遠覽直下見溟渤雲垂大鵬翻波動巨鰲沒風潮  
真洵湧神怪何翕忽觀竒跡無倪好道心不歇攀條摘

朱實服藥鍊金骨安得生羽毛十春臥蓬闕

越中秋曙

唐  
李白

越水遶碧山周廻數千里乃是天鏡中分明畫相似  
愛此從冥搜永懷臨湍遊一爲滄波客十見紅葉秋  
觀濤壯天險望海令人愁路遐迫西照歲晚悲東流  
何必探禹穴逝將歸蓬邱不然五湖上亦可乘扁舟

寶林寺作

唐  
徐浩

茲山昔飛來遠自瑯琊臺孤岫龜形在深泉鰻井開  
越

王屢登陟何相傳詞才塔廟崇其巔規模稱壯哉禪堂  
清淨暑高閣無恢矣照耀珠吐月鏗轟鐘隱雷揆予久  
纓弁末路遭遘迴一棄滄海曲六年稽嶺隈逝川惜東  
駛馳景憐西頽腰帶愁疾減容顏衰悴催賴居茲寺中  
法士多壞能洗心聽經論禮足蠲凶災永願依勝侶清  
江乘渡杯

謁禹廟

唐  
徐浩

畝澮敷四海川源滌九州既膺九命錫乃建洪範疇鼎

革固天啟運興非人謀肇開宅土業永庇昏墊憂山足  
靈廟在門前清鏡流象筵陳玉帛容衛儼戈矛探穴圖  
書朽卑宮堂殿修梅梁今不壞松栢古仍留負責故鄉  
近竭來申俎羞爲魚知造化嘆鳳仰徽猷不復聞夏樂  
惟餘奏楚幽婆娑非舞羽鏜鞳異鳴球盛德吾無間高  
功誰與儔災淫被凶慝助聖擁神休出谷鶯初語空山  
猿獨愁春暉生草樹柳色暖汀洲恩貸題輿重榮殊衣  
錦遊宦情同械繫生理任桴浮地極臨滄海天遙過斗

牛精誠如可諒他日寄冥搜

有懷台州司戶鄭十八虔

唐杜甫

天台隔三江風浪無晨暮鄭公縱得歸老病不識路昔  
如水上鷗今如罝中兔性命由他人悲辛但狂顧山鬼  
獨一脚蝮蛇長如樹呼號傍孤城歲月誰與度從來禦  
魑魅多爲才名誤夫子嵇阮流更被時俗惡海隅微小  
吏眼暗髮垂素黃帽映青袍非供折腰具平生一杯酒  
見我古人遇相望無所成乾坤莽回互

東陽郡齋中詣南山招韋十

唐錢起

霽來海半山隱映城上起中峰落照時殘雪翠微裏同  
心久爲別孤興那對此良會何遲遲清揚瞻則邇

西陵口觀海

唐薛據

長江漫漫湯近海勢彌廣在昔胚渾凝融爲百川決地  
形失端倪天色渾滉漾東南際萬里極目遠無象山影  
乍浮沉潮波忽來往孤帆或不見樵歌猶想像日暮長  
風起客心空振蕩浦口霞未收潭心月初上林嶼幾遭

迴亭臯時偃仰歲晏訪蓬瀛真游非外獎

嚴公釣臺作

唐  
顧況

靈芝產遐方威鳳家重霄嚴生何耿潔託志肩夷巢漢  
后雖則貴子陵不知高糠粃當世道長揖夔龍朝掃門  
彼何人升降不同朝捨舟遂長往山谷多清飈

酬房杭州

唐  
顧況

郡樓何其曠亭亭廣而深故人牧餘杭留我披胸襟滿  
簞閱新作璧玉誕清音流水入洞天宵豁欲凌臨闢險

延北阜難道陟南岑朝從山寺還醒醉動笑吟荷花十  
餘里月色攢湖林父老惜使君却欲速華簪

嚴陵灘下寄常建

唐

奚賈

日入溪水靜尋真此亦難乃知滄洲人道成仍釣竿漾  
棹乘微月振衣生早寒紛吾成獨往自昔耽考槃已息  
漢陰誚且同濠上觀曠然心無涯誰問容膝安

奉使過石門觀瀑

并序

唐

丘丹

謝康樂宋景平中爲永嘉守有宿石門巖上詩余六



代叔祖梁中書侍郎天監中有過石門瀑布詩後亦  
爲此郡小子大歷中奉使竊有繼作雖不足克紹祖  
德追踪昔賢蓋造奇懷感之志也

溪上望懸泉耿耿雲中見披榛上巖岫峭壁正東面千  
仞瀉聯珠一潭噴飛霞嵯漚滿山響坐覺炎氛變照日  
類虹霓從風似綃練靈奇既天造惜處窮海甸吾祖昔  
登臨謝公亦遊行王程懼淹泊下磴空延眷千里雷尚  
聞巒迴樹葱蒨此來共賤役探討愧前彥永欲洗塵纓

終當慙此願

爛柯山三首

唐劉迥

白雲引策杖苔徑誰往還  
漸見松樹偃時聞鳥聲閒  
豁然喧氛盡獨對萬重山

石橋架絕壑蒼翠橫鳥道憑檻雲  
脚下潁陽日猶蚤霓裳倘一遇  
千載長不老

繩牀宴坐久石窟絕行跡  
能在人代中遂將人代隔  
白雲風颺飛非欲待歸客

游爛柯山四首

唐  
李幼卿

拂霧理孤策，薄霄眺層岑。  
迴升烟霧外，豁見天地心。  
物象不可及，遲回空詠吟。

巨石何崔嵬，橫橋架山頂。  
傍通日月過，仰望虹霓迴。  
聖者開津梁，誰能度茲嶺。

二仙自圍碁，偶與樵夫會。  
仙家異人代，俄頃千年外。  
笙鶴何時還，儀形尚相對。

石室過雲外，二僧儼禪寂。  
不語對空山，無心向來客。  
客作

禮未及終忘循舊形跡

游爛柯山四首

唐  
李深

尋源路不迷絕頂與雲齊  
坐引羣峰小平看萬木低  
雙林春色上正有子規啼

嵌空橫洞天磅礴倚崖巘  
宛如虹勢出可賞不可轉  
真興得津梁抽簪永游衍

羽客無姓名仙棊但聞見  
行看負薪客坐使桑田變  
懷古正怡然前山早鶯轉

稽首期發蒙吾師豈無說安禪即方丈演法皆寂滅鳴  
磬雨花香齋堂飯松屑

游爛柯山三首

唐  
羊 滔

步登春巖裏更上最遠山聊見宇宙濶遂令身世閒清  
輝賞不盡高駕何時還

石梁聳千尺高盼出林嶺亘壑躡丹虹排雲弄清影路  
期訪道客游衍空井井

沙門何處人攜手俱滅跡深入不動境乃知真圓寂有

時歸羅浮白日見飛錫

游爛柯山三首

唐薛戎

登巖已寂歷絕頂更嵒荒  
響像如天近窺臨與世遙  
悠然暢心目萬慮一時銷

聖游本無跡留此示津梁  
架險知何適遺名但不忘  
只今成佛宇化度果難量

二仙行自適日月徒遷徙  
不語寄手談無心引樵子  
蒙分一丸藥相偶窮年祀

游爛柯山三首

唐  
謝 勳

獨凌清景出不視衆山中雲日遙相對川原無不通自  
致高標末何心待馭風

仙奕示樵夫能言忘歸路因看斧柯爛孫子髮已素孰  
云遺跡久舉意如旦暮

仙僧會真要應物常淵默惟將無住理轉與信人說月  
影清江中可觀不可得

早發杭州泛富春江寄陸三十一公佐

唐  
權德輿

候曉起徒馭春江多好風白波連青雲蕩漾晨光中四  
望浩無際沈憂將此同未離奔走途但恐成悲翁俯見  
觸餌鱗仰目凌霄鴻纓塵日已厚心累何時空區區此  
人世所向皆樊籠惟應杯中物醒醉為窮通故人懸圃  
姿瓊樹紛青蔥終當從此去共結蘭桂叢

嚴陵釣臺下作

唐  
權德輿

絕頂聳蒼翠清湍石磷磷先生晦其中天子不得臣心



靈棲顥氣纓冕猶緇塵不樂禁中臥却歸江上春潛驅  
東漢風日使薄者醇焉用佐天子持此報故人人知大  
賢心不獨私其身弛張有深致耕釣陶天真奈何清風  
後擾擾論屈伸交情同市道利欲相紛綸我行訪遺臺  
仰古懷逸民贈繳鴻鵠遠雪霜松桂新江流去不窮山  
色凌秋旻人世自今古清輝照無垠

越中山水

唐  
孟郊

日覺耳目勝我來山水州蓬瀛若髣髴田野如泛浮碧

嶂幾千遶清泉萬餘流莫窮合沓步孰盡派別遊越水  
淨難污越天陰易收氣鮮無隱物目視遠更周舉俗媚  
蔥蒨連冬擷芳柔菱湖有餘翠茗圃無荒疇賞異忽已  
遠探竒誠淹留永言終南色去矣銷人憂

桐廬山中贈李明府

唐  
孟郊

靜境無濁氛清雨零碧雲千山不隱響一葉動亦聞即  
此佳志士精微誰相羣欲識楚章句袖中蘭茝薰

送超上人歸天台

唐  
孟郊

天台山最高動躡赤城霞何以靜雙目掃山除妄花何  
以潔其性瀘泉去泥沙靈境物皆直萬松無一斜月中  
見心近雲外將俗賒山獸護方丈山猿捧袈裟遺身獨  
得身笑我牽名華

代杭人作使君一朝去二首

唐元稹

使君一朝去遺愛在人口惠化境內春才名天下首爲  
問龔黃輩兼能作詩否

使君一朝去斷腸如割檠無復見冰壺惟應鏤金石自

此一州人生男盡名白

郡中即事

唐白居易

漫漫潮初平熙熙春日  
至空濶遠江山晴明好  
天氣外有適意物中無  
繫心事數篇對竹吟一  
杯望雲醉行攜杖扶力  
臥讀書取睡久養病形  
骸深諳閒氣味遙思九  
城陌擾擾趨名利今朝  
是雙日朝謁多軒騎寵  
者防悔尤權者懷憂畏  
爲報高車蓋恐非真富  
貴

嚴十八郎中在郡日改  
制東南樓因名清輝未  
立

標榜徵歸郎署予既到郡性愛樓居宴遊其間

頗有幽致聊成十韻兼戲寄嚴

唐

白居易

嚴郎置茲樓立名曰清輝未及署花榜遽徵還粉闥去  
來三四年塵土登者稀今春新太守灑埽施簾幃院柳  
煙婀娜檐花雪霏微看山倚前戶待月闌東扉碧窻夏  
瑤瑟朱闌飄舞衣燒香卷幕坐風燕雙雙飛君作不得  
住我來幸因依始知天地間靈境有所歸

三年爲刺史二首

唐

白居易

三年為刺史無政在人口  
唯向郡城中題詩十餘首  
慙非甘棠詠豈有思人不

三年為刺史飲水復食藥  
唯向天竺山取得兩片石  
此抵有千金無乃傷清白

天竺寺七葉堂避暑

唐白居易

鬱鬱復鬱鬱伏熱何時畢  
行入七葉堂煩暑隨步失  
簷雨稍霏微窻風正蕭瑟  
清宵一覺睡可以銷百疾

題天竺南院贈閑元旻清四上人

唐

白居易

雜芳澗草合繁綠巖樹新山深景候晚四月有餘春竹  
寺過微雨石逕無纖塵白衣一居士方袍四道人地是  
佛國土人非俗交新城中山下別相送亦殷勤

越女詞

唐  
鮑溶

越女芙蓉妝浣紗清淺水忽驚春心晚不敢思君子君  
子縱我思寧來浣溪裏

宿吳興道中茗村

唐  
鮑溶

浮客倦長道秋深夜如年久行惜日月常起雞鳴前夕

計今日程息車在苕川霜中水南寺金磬泠泠然疇昔  
此林下歸心巢頂禪身依寤昏寐智月生虛圓羈旅違  
我程去留難雙全觀身話往事如夢遊青天明發止賓  
從寄聲琴上弦聊書越人意此曲名思仙

聞韋駙馬使君遷拜台州

唐鮑溶

溟藩軫帝憂見說初鳴騶德勝禍先戢情閒思自流  
殷桑柘空廩實雀鼠稠諫虎昔賜駿安人將問牛曾陪  
後乘光共逐平津遊旌旆擁追賞歌鐘催獻酬音徽一



寂寥貴賤雙沉浮北郭之中產東方稱上頭躋山望百  
城目盡增遐愁海逼日月近天高星漢秋無階異漸鴻  
有志慙馴鷗終期促孤櫂暫訪天台幽

游天台山

唐  
張 祜

崔嵬海西鎮靈跡傳萬古羣峰日來朝累累孫侍祖三  
茅即拳石二室猶塊土傍洞窟神仙中巖宅龍虎名從  
乾取象位與坤作輔鸞鶴自相羣前人空若瞽巉巖割  
秋碧媧女徒巧補視聽出塵埃處高心漸苦纔登招手

石肘底笑天姥仰看華蓋尖赤日雲上午奔雷撼深谷  
下見山脚雨回首望四明矗若城一堵昏晨邈千態恐  
動非自主控鵠大夢中坐覺身詡詡東溟子時月却孕  
元化母彭蠡不盈杯浙江微辨縷石梁屹橫架萬仞青  
壁豎却瞰赤城顛勢來如刀努盤松圍清道九里天莫  
覩穹崇上攢三突兀傍聳五空崖絕凡路癡立麋與塵  
邈峻極天門覩深窺地戶金庭路非遠徒步將欲舉身  
樂道家流惇儒若一矩行尋白雲叟禮象登峻宇佛闕

繞杉嵐仙壇半榛莽懸崖與飛瀑險噴難足俯海眼三  
井通洞門雙闕拄瓊臺下昏側手足前採乳但造不死  
鄉前勞何足數、

早春錢塘湖晚眺

唐  
張 祜

落日下林坂撫襟睇前蹤輕澌流迴浦殘雪明高峰仰  
視天宇曠俯登雲樹重聊當問真界昨夜西巒鐘

釣臺懷古

唐  
劉 駕

澄流可濯纓嚴子但垂綸孤坐九層石遠笑清渭濱潛

龍飛上天四海豈無雲清氣不零雨安使洗塵氛我來  
吟高風髣髴見斯人江月尚皎皎江石亦磷磷如何臺  
下路明日又迷津

玉笥山留題

宋 徐鉉

仙鄉會應遠王事知何極征傳莫辭勞玉峰聊一息形  
骸已銷散心想都凝寂真氣自清虛非關好松石九仙  
皆積學洞壑留遺跡游子歸去來胡爲但行役

冬日陪胡武平游西余精舍

宋 梅堯臣

侵晨霜氣嚴溪口水已合烏榜將進遲寒篙旋推拉遙  
看松竹深雪屋藏山衲登臨興都盡薄暮沿清雪

送慧勤歸餘杭

宋 歐陽修

越俗僭宮室傾貲事雕牆佛屋尤其侈耽耽擬侯王文  
彩瑩丹漆四壁金焜煌上懸百寶蓋宴坐以方牀胡爲  
棄不居栖身客京坊辛勤營一室有類燕巢梁南方精  
飲食菌笋鄙羔羊飯以玉粒粳調之甘露漿一饌費千  
金百品羅成行晨興未飯僧日昃不敢嘗乃茲隨北客

枯栗充饑腸東南地秀絕山水澄清光餘杭幾萬家日  
夕焚清香烟霏四面起雲霧雜芬芳豈知車馬塵髣髴  
染成霜三者孰苦樂子奚勤四方乃云慕仁義奔走不  
自遑始知仁義力可以治膏肓有志誠可樂及時宜自  
彊人情重懷土飛鳥思故鄉夜枕聞北鴈歸心逐南檣  
歸兮能來否送子以短章

越州飛來山

宋 孔平仲

物之體性重惟有石最堅迴風捲黃沙直下萬丈淵如

何崔嵬山乃解飛青天瑯琊趨會稽道理固甚懸想當  
初來時詭異可得言豈非巨靈擘或謂秦帝鞭雷公挾  
電母歟霍相後先夸娥負崖脚天丁撮其顛北斗借神  
兵虎豹下九關海王驅魚送百里聞腥羶悲號與僊喘  
灑汗成流川呼雲以自蔽日月不得宣栖鳥失其巢哀  
哀啼白猿草木困擺撼枝葉半不全置之秦望陰百怪  
散蒼烟有龍走不輟化爲錦色鰻攢身入竅穴噴出清  
冷泉都人駭相報平地見巍然既來亦能去惟恐復騰

騫浮屠鎮其上副以屋蟬聯朝吟諸佛經暮誦西方禪  
以此相繫縛羈孤幾千年我聞已有日今朝始攀援高  
堂置美酒遠目凌孤鳶老僧爲我說指畫當我前是否  
難致詰且進黃金船

和晏相公湖上遇雨

宋 韓 維

公堂日多暇薄暮游清池孤雲從西來若與飛蓋期急  
雨亂荷芰紅綠左右披沙禽帶濕起簇簇守前坻烟樹  
晦空曲蟬聲寂無遺殘炎一洗濯霽景開林西禽飛還



清波蟬噪復故枝晚槿揚朱華秋草含碧滋篙舟出隄  
去微風滿平漪卷幔極悵望正見隗與箕舉酒無塵情  
慨然起遐思永懷古先訓默道通介宜乃知賢哲心所  
得非游嬉

送謝景初廷評宰餘姚

宋

范仲淹

世德踐甲科青紫信可拾故鄉特榮輝高門復樹立餘  
姚二山下東南最名邑煙水萬人家熙熙自翔集又得  
賢大夫坐堂恩信敷春風爲君來綠波滿平湖乘興訪

隱淪今逢賀老無文藻凌雲處定喜江山助未能同仙  
舟離樽少留駐行行道不孤明月相隨去

送錢藻出守婺州得英字

宋

蘇軾

老手便劇郡高懷厭承明聊紆東陽綬一濯滄浪纓東  
陽嘉山水未到意已清過家父老喜出郭壺漿迎子行  
得所願愴恨居者情吾君方急賢日旰坐邇英黃金招  
樂毅白璧賜虞卿子不少自貶陳義空崢嶸古稱爲郡  
樂漸恐煩敲榜臨分敢不盡醉語醒還驚

僧清順新作垂雲亭

宋  
蘇軾

江山雖有餘亭榭苦難穩登臨不得要萬象各偃蹇惜  
哉垂雲軒此地得何晚天功爭向背詩眼巧增損路窮  
朱欄出山破石壁很海門浸坤軸湖尾抱雲巘葱葱城  
郭麗淡淡烟村遠紛紛鳥雀去一一漁樵返雄觀快新  
獲微景收昔適道人真古人嘯吟慕嵇阮空齋臥蒲褐  
芒屨每自捆天憐詩人窮乞與供詩本我詩久不作荒  
澁旋鉏墾從君覓佳句咀嚼廢朝飯

懷西湖寄晁美叔同年

宋 蘇軾

西湖天下景遊者無愚賢深淺隨所得誰能識其全嗟  
我本狂直早爲世所捐獨專山水樂付與寧非天三百  
六十寺幽尋遂窮年所至得其妙心知口難傳至今清  
夜夢耳目餘芳鮮君持使者節風采爍雲烟清流與碧  
巘安肯爲君妍胡不屏騎從暫借僧榻眠讀我壁間詩  
清涼先煩煎策杖無道路直造意所便應逢古漁父葦  
間自延緣問道若有得買魚勿論錢

杭州故人信至齊安

宋 蘇軾

昨夜風月清夢到西湖上朝來聞好語扣戶得吳餉輕  
圓白曬荔脆醎紅螺醬更將西崦茶勸我洗江瘴故人  
情義重說我必西向一年兩僕夫千里問無恙相期結

書社

故人相約釀錢雇僕未一歲再至黃

未怕供詩帳

僕頃以詩得罪有司移杭取境內所

留詩杭州供數百詩謂之詩帳

還將夢魂去一夜到江漲

江漲杭州橋名

次韻趙景貺春思且懷吳越山水 宋 蘇軾

歲華來無窮老眼久已靜春風如繫馬未動意先騁西

湖忽破碎鳥樂魚動鏡縈城理枯瀆放闌起膠艇顧君  
營此樂宦事何時竟

清河西湖三  
閘君督成之

思吳信偶然出處付

前定飄然不繫舟乘此無盡興醉翁行樂處草木皆可  
敬明朝游北渚急掃黃葉徑白酒真到齊紅裙已放鄭  
酒尚有香泉一壺爲樂  
全先生服不作樂也

寄參寥

宋  
陳師道

平生西方願擺落區中緣惟於外人相從可忘年道  
人贊公徒相識幾生前早作步兵語晚參雲門禪拾策

孤山下一室頗蕭然林昏出幽磬竹杪橫疏烟昨日寄  
書至坐想參寥泉此泉如此公遇物作清妍一別今幾  
時綠首成白顛子亦憐我老我豈要子憐會逢萬里風  
一繫五湖船酌我巖下水吟子山中篇

泊吳興觀音院

宋  
秦觀

金刹負城闌閨然美栖止卞山直穹窿苔水相依倚霜  
檜鬱冥冥海棕鮮疑疑廣除庇夏陰飛棟明朝晷溪光  
鳬鷺邊天色菰蒲裏緒風傳畫舫壁月窺夜禮洩雲曄

層空規荷鑑幽汴舩艗烟際下鐘磬林端起顰牙戲清  
深嶽峯撲空紫所過信悠然此生如寄耳志士耻溝瀆  
征夫念桑梓攬衣軒楹間獻歌何窮已

餘姚飯

宋陳造

昨暮浴上虞今晨飯餘姚官期有餘日我行得逍遙盤  
實剝芡芰羹魚薦蘭椒一飽老人事茗飲亦復聊捫腹  
每自愧昔賢尚簞瓢僧垣棲翠微金碧煥山椒龍泓甘  
可茹塔鈴如見招遲留本不惡況復待晚潮



遊慈溪龍虎軒

軒有石湖  
碑如新刻

宋

陳造

坐曹可勝勞出郭復行役半年定海令三度慈溪客慈  
溪足勝處山秀江繚碧終然縈夢寐遑此事遊歷高軒  
闕龍虎表表市闌側得興不暇慵徙倚且數刻洞戶初  
推敲階除漸登陟向來攫怒勢枯幹抱頑石乃知名實  
間未易膠今昔尚喜詩翁碑不受蒼蘚蝕何但神所護  
人未忘翁德使非老眼明斯遊竟無得

清明西湖次韻

宋

陳造

蘇公舊堤東增築更千步右爲縈回溪夾以青葱樹晴  
湖映碧山詩客更多助醉鄉赴新約書癡悔前悞況此  
好清明酒果隨意具向來計追歡幾番陰雨沮今者成  
清遊仍免俗子汚斜陽不無情似戀花柳住春光念報  
答襁屨須好句

五言天台山送僧象微歸山

宋 沈 邁

吾聞天台久常讀興公賦茲爲東南鎮神靈之所據奇  
挺究萬狀嵩岱不足語頗疑說過夸特爲辭之嫖象微

乃州民能識山之故從容試爲問聊得一一疏赤城建  
霞標上與斗牛附萬有八千丈矗若天一柱瀑布發高  
源飛流翻四注雪霜浮虛空晦明亂朝暮巖足多丹石  
光華燦寶璐櫛溪百餘仞欲濟毛骨怖九折凌峻梁五  
界窮幽路芝蘭散奇草松桂羅嘉樹祥風吹白雲飄然  
若可御幽閔足壞怪纖悉難畢具凡迹古不到神物陰  
自護傳聞昔人說中有洞天處是名不死墟衆真所游  
聚玉堂敞金庭碧林列瑤圃有能從而求得之乃仙去

斯言寧可信良非吾所慕吾志本丘壑久已失厥趣誰  
言石渠客乃甚轍中鮒秋風日已高歸心浩欲驚茲山  
夙所愛送爾緬東顧吾廬因爾卜俾來審繪素

勸農道場山

宋王炎

練日遵詔條行春勸耕事擁旆有傳呼據鞍小馳驚  
兒童喜聚觀父老歡來詣松徑度坡陀蓮宮得清闕此  
行非遨遊所職在撫字示之淺易語諭以丁寧意扶杖  
既言歸解衣聊少憩山中無俗情物外有幽趣僧閒衆  
所

羨農困吾甚媿不敢飽登臨肩輿下山去

浦江華藏寺如勝上人欲募施者開田佐僧供以

長老皎公書來求予詩作二十韻奉勉

宋  
范 浚

浮屠謝朋親屏跡藏巖幽多規脫徭賦豈必皆禪流自  
言佛遺經墾土為愆尤不耕徒穀腹何異鼠雀偷告之  
勿浮食當須力鋤耰前修舉鋤事千載垂風猷奈何啞  
羊僧百語不領頭皎公老禪伯雅慕吾孔周其徒有如

勝用意非常儔欲開千畦田更辦兩具牛率彼枯木衆  
躬耕食其秋釋門有添丁乃翁坐無憂與國助耘耔疲  
氓庶其瘳此意良足嘉感之歎綢繆昔聞白黑衆十萬  
俱清修鳩金置千畝給供無時休於今豈無人勝也當  
尋求長途觸隆冬一衲寒颼颼朱門立雪久歡喜無生  
愁作詩勸勇往以俟歲晚收

寄開化李令光二首

宋程俱

我行阡陌間苗麥已復清茅茨間新藁雞犬有和聲不

見吏索錢田家得其生雞犬亦肥字不遭無事烹於斯  
可觀政豈在赫赫名父老亦相語驩然就春耕官租及  
時了卒歲樂無營

山間古梅林有鴉集其端不飛亦不鳴彈射不敢干下  
窺羣雀雛啄鰕剗其肝欣然舐兩爪意得良自安飛來  
多凡鳥助此凶且殘安知萬山曲亦復鳴棲鸞相咻固  
不可見嚇技亦殫衆鳥既有恃相期在歲寒

寄題淳安陳令君讀書林

宋  
吳 儆

能吏事深刻商利謹毫釐俗吏趨期會簿書自羈縻寥  
寥弦歌聲千古空餘思還淳山水邑令君邱壑安邑民  
本無事君亦何所爲治已物自治化行風漸移君復何  
所欲讀書常不足拄腹五千卷插架三萬軸曾未出毫  
芒萬室已蒙福堂東松竹林昔時闕荒榛堂中燈燭光  
昔時照紅裙今何聲吾伊蕭蕭風雨晨問君有社稷亦  
復有人民奈何徒自苦學道則愛人

寄題陳同甫抱膝亭

宋  
陳傅良



稻梁不難謀軒冕亦易得胡為抱膝翁惻惻復惻惻秋  
風墮碧梧鳳鳥去無迹愁吟草際蛩兒女淚盈臆忽然  
一長嘯孤響起空寂令人識雅頌一唱三歎息室廬在  
路旁耕鑿在民籍行人聽笑語稚子共眠食讀書果何  
罪鬚髮又半白此意太勞勞此身長抑抑抱膝且不可  
出門更何適但勿問門外蓬蒿若干尺

次韻曹守懷玲瓏山

宋 沈與求

泉石有膏肓客游夢想半如饜極羊酪投匕念鄉饌懷

哉小玲瓏舊賞常酣宴玉女下雲窗輕我年未冠誅茅  
老三間此意已懸斷少須草堂資兩足那可絆謝公愛  
東山自結尋幽伴詩筒忽相先紙價豈容賤流傳從使  
君感此歸思亂擷蘭躡危根漱石俯長澗野性等麋鹿  
百嗜寧食薦攬衣中夜興測漏疾流眄局怒愧駑筋卑  
飛傷短翰正使屐齒折未改柯斧爛時節脫駛徂遲暮  
空浩歎何當脂下澤去路鬱交貫

和喻叔奇游天衣

宋

王十朋

稽山高入雲鑑湖遠浮空夏后留遺跡晉宋多名公我  
來歲及周夢寐懷清風茲欣天氣佳扶桑欲曛曨駕言  
天衣游盍簪盡駕鴻經夕戒行李如期集仙宮聯騎出  
城南行行指秦峰千巖競吐秀眼界殊清空招提在何  
許十里松陰濃林端忽鐘磬與客為先容羣簪擁花界  
雙佩鳴寒淙試將比天台大畧如思豐天台有思豐堂首讀邕  
浩碑妙理開昏蒙細觀元白詩邱壑羅胸中蕭壁尚堪  
面梁薪幾經烘寺有梁時薪火茲宮現有相禪客談無同朝陽

最蘄絕白雲抹其胸杜鵑天下無至今滿山紅雞僧始

開山道業聞清衷思舉照不起高價傾江東袈裟縷黃

金宮女百針工昭明親抱送禮意何太恭白馬忽渡江

臺城困英雄國破遺衣在丹青落塵客

寺舊有昭明像

我輩皆

書生意氣飄如虹蠟屐共尋幽寧求香火功載酒懷賀

老招隱思戴顓賦詩追吹臺一飯敢忘忠況我賢使君

德宇尤疏通楚醴餉百榼白衣走山中嗟予何為者天

資愧空侗謬與酒中仙適同戢山松

戢山有八松

同年妙詞

章況有山水供古詩如古琴山高水溶溶背囊小溪奴  
捧硯長髯翁勝游與佳作二美悉具逢品題徧羣英波  
瀾及竒蹤掬水弄花句比擬猶凡庸茲會如蘭亭同行  
類荀龍盛事在詩史奚用呼畫工

同錢用明用章游白石巖

宋王十朋

謝公好山水得郡古東甌造物惜佳境雅志多不酬松  
蘿蔽雁蕩烟靄埋龍湫行田經白石不到仙山頭寥寥  
數百年天賦黃冠流巍然萬仞崖壁立東南州誰將補

天手化出白玉樓兩龕藏洞府中有羣仙遊上通尺五  
天下接三神洲飛泉落巖腰碧澗鳴山陬羣峰真培塿  
滄海為渠溝隘視人間世萬象同蜉蝣我家鴈蕩陽崎  
嶇厭經邱翩翩錢公子呼我尋巖幽初驚小雨密忽掃  
羣陰浮杖履窮巔岼一洗塵埃眸山林有真樂富貴何  
足求但願乞二山不願萬戶侯

度雁山

宋王十朋

雁山五經眼茲行尤可觀初冬天氣佳雁蹄山未寒有

日照幽谷無雲翳，層巒入境見祥雲。  
振衣登馬鞍，瀑水飛玉龍。  
羽旗導翔鸞，石柱屹天外。  
卓筆書雲端，靈峰觀石室。  
杖履穿巔岼，山禽知我來。  
好音若相歡，羣峰列春筍。  
丹青狀尤難，行色愧匆匆。  
更約它時看。

過瑞安

宋

王十朋

我家古樂成，老未識安固。  
偶把清源麾，首問南塘路。  
解維日已晏，入境天欲暮。  
張子自陶山，扁舟惠然顧。  
沈君壯年別，相見髮垂素。  
訪舊多不存，來觀莫知數。  
平原二

十人邂逅喜相遇謂我宜少留欲教不腆具我驅不敢  
疾曲為一宵住臨江有高閣登覽可以賦瀾同孟子觀  
目作少陵注燈火照魚龍談笑驚鷗鷺含杯鄉意濃竊  
食君恩誤晨起酒未醒潮來報催渡

夜出偏門還三山

宋  
陸游

月行南斗邊人歸西郊路水風吹葛衣草露濕芒屨漁  
歌起遠汀鬼火出破墓淒清醒醉魂荒怪入詩句到家  
夜已半佇立叩蓬戶穉子猶讀書一笑慰遲暮



稽山行

宋 陸 游

稽山何巍巍浙江水湯湯千里亘大野勾踐之所荒春  
雨桑柘綠秋風秔稻香村村作蟹棹處處起魚梁陂放  
萬頭鴨園覆千畦薑春碓聲如雷私債逾官倉禹廟爭  
奉牲蘭亭共流觴空巷看競渡倒社觀戲場項里楊梅  
熟采摘日夜忙翠籃滿山路不數荔枝筐星馳入侯家  
那惜黃金償湘湖蓴菜出賣者環三鄉何以共烹煮鱸  
魚三尺長芳鮮初上市羊酪何足當鏡湖瀦衆水自漢

無旱蝗重樓與曲檻  
激灩浮湖光舟行以當車  
小繖遮新粧淺坊小陌間  
深夜理絲簧我老述此詩  
妄繼古樂章恨無季札聽  
大國風決決

石堰村

宋陸游

木落山不蔽水縮舟自獻  
寒日晚更明村巷曲折見  
小婦鳴機杼童子陳筆硯  
農家雖苦貧終勝異鄉縣  
君看宦遊子豈無墳墓戀  
生死在故鄉切勿慕乘傳

於潛道中

宋洪邁

山行厭輦確理策扶歌危綠野三兩家一息知可期冉  
冉青林端炊烟裊晴暉居民豐且樂恐是太古遺那知  
都邑間百索困鞭笞繁華今何有半作道旁羸

釣臺阻風去得風便

宋

薛季宣

先生非釣名魚釣清冷水太空長廓然浪迹秋光涖人  
憂我何憂忘怒亦忘喜建武非漢元詎有留侯起神明  
旋地軸姓氏更七里雲臺已埋沒嚴瀨殊清泚峩峩二  
釣臺高插烟霞裏首陽遠相比萬祀恒不圯我來經舊

廬敢卜瞻遺几東風迴我舟江步時須艤仰觀嚴像設  
敬拜豁煩鄙層臺暢登臨無復徒仰止縈紆古道屈望  
望攀蘿藟崇基介巖石特立端不倚削成二山碧平止  
章如砥衆山鬱青葱環合紛礧礧清塵森萬象觸睫同  
一視古人不可見可見安仁美旅情殆忘返回棹西風  
駛青蒲挂一席入望俄城市瞥如周變秦物物非古始  
乃知主人意待我非朱紫送迎因下風忙遽均倒屣烹  
茶出清泉盤饌羅雙鯉飲之以珍羞浣濯予塵滓相忘

語默間不假談名理去留維我意今昔交爾汝此情固  
冥契何必親之子

宿石門

宋葉適

好溪瀉百壑南北傾萬峰山凡堆阜俗映岸羞為容石  
門忽秀出老幹蔭渟洪捨舟從口入便已離塵中衆芳  
拱窟宅環峒獻奇穠藤蘿異態度尺寸疑施功錦茵翠  
織成照耀無春冬水行千丈高歎薄不可窮更有洗頭  
盆雲深霧常封昔年謝康樂築居待其終繼作者邱裴

語言亦稱雄邈然百世後未忝騷人風栖栖三羽衣日  
晏齋厨空之子歇過漿暫洗氛埃胸自歎苦淹留寂莫  
不易供嗟我老無用佞山久成翁結廬會昌側勢落魚  
蝦叢種竹似束蒿栽松如斷蓬小兒餽盆盂何時至周  
公會當同此住代輸助之春

入餘杭縣

宋高似孫

明發遵西陸驅車月流光佳山迎車來知是古餘杭危  
樹露如雨平野日未陽支流瀉清源弱羽無高翔人家

叢灌下世載山水鄉扣門作午憇白飢羞文魴邂逅有  
足歡離合非其常主人不予鄙予留亦徜徉

重經洞霄

宋 周文璞

曩既負幽討今敢萌遐心扶桑下陽馭砉磬浮空林瓊  
臺渺泆蕩藥佩棲高深屢見仙驥舞遙聆元女吟如遂  
都開闢那復憂崎嶇抱關職貴重啟閉非所任靈飈掣  
虬戶同此琅琅音願併翠綃水寫之朱絲琴

月夜泛舟姚江

宋 樓 鑰

秋暑不可耐幾思泛中川晚來興有適溪船偶及門涼  
月纔上弦平潮可黃昏倚楫縱所如臥看龍泉山長虹  
跨空濶過之凜生寒坐穩興益佳夜氣方漫漫草蟲鳴  
東西飛鳥相與還仰頭數明星垂手搖碧瀾坐客惜此  
景不及攜清樽無酒要不惡徜徉足幽歡幽歡有何好  
叩舷澹無言

求仲抑招遊山歸途遇雨

宋樓鑰

竹輿繞湖濱宿霧尚厭浥徑到玉岑下坐久客始集起



穿靈石山萬松介而立梅天氣清潤空翠行可挹古藤  
幾百年枝蔓兩山及見說暮春時花繁紅燭燭直疑老  
潛虬初起夜來蟄俯玩歲寒泉齒冷不敢吸相將上龍  
泓塵鞅謝羈馮洞有靈獸居臨深心岌岌魚游明鏡中  
巨浪無三級寒苔載水去萬頃潤原隰濛濛山雨來歸  
僕鳥飛急野興殊未已日昃不暇給衝泥上湖船雨陣  
遽奔襲飄風將急點回旋驚四入中流益蕩兀短篷不  
當笠停篙亦久之怒勢不少戢我徒方嘯歌弗為改豪

習但耻餅囁莫問衣裳濕

送漳丞上虞

宋樓鑰

我老不復仕行將掛衣冠  
兩子俱貳令官職恰一般  
列川且書考上虞亦之官  
人言易捧檄歸奉重親歡  
我意正不爾期汝政可觀  
食焉怠其事古訓戒捨饒  
汝職去民親簿書當細看  
一邑無不問正爾良獨難  
江海匝三垂長堤捍驚湍  
埭高幾如山潮至不留殘  
宣和有遺迹能使潮浸灘  
陂湖謹蓄洩可以救旱乾  
長溝濟漕運浚

治令通寬此皆丞所職勿憚心力殫江頭有東山水懷  
謝家安邑有李與豐況復居二潘尚友更從游問學加  
研鑽平時固知汝廉謹無欺謾涉世終未深戒汝能無  
言故鄉去帝鄉舟馭多往還失已固不可待人亦多端  
罔求違道譽善遣非意于窮達自有時此理真如丹聚  
散不足較豈得長團樂閒靜我所便汝其自加餐有時  
或乘興往來二子間蹈雨送汝行浮家當游般走筆如  
家書誰能苦雕刻

過舒臨海故宅

宋謝翱

破壁濕海蘚水邊日氣蒸云是舒公宅其孫艾且仁昔  
公初作尉視事即斬人上書稱臣曹待罪滄海濱天子  
有詔至汝曹可治民爾時荆文公上方邑之鄴聞此輒  
異之久曾公秉鈞謂此非狂狷引用至中丞立朝思蹇  
諤庶以報君親蘇公下詔獄讒者用事新於此與有力  
豈為重其身晴風吹海雨山川尚橫陳俛仰勿太息徒  
為驚爾鄰

會稽秋日觀山

宋

陳鑒之

荒塍間流水橐落風颭颭前山與幽人亭亭共清秋遠  
近日明晦隱見雲去留木末一叟歸犬鳴茅舍幽憶昔  
典午東劔佩森名流勝地慰遠懷茲焉久綢繆漁磯與  
樵徑今有斯人不池石老苔髮空餘螺蚌游世有古今  
異郢歌聊自酌醉眼時摩挲此山即前修

洞霄宮

宋

林景熙

洞天有別雲福地無凡土嘉名此兼擅靈氣適專聚峰

巒互重掩雲霧自吞吐飄然乘冷風一瓣謁瓊宇住山  
老黃冠迎客琪樹午魚魚美少年華裾集齋鼓往者修  
鍊人飛昇接高武爾來何寂寥山川亦今古甲第疑王  
侯億萬富倉庾所以氣體移學道不精苦吾聞郭許儔  
卓菴老林莽終日對白雲餐松飲石乳

大滌洞天

宋 林景熙

九鎖絕人寰一嶂聳天柱自從開闢來著此洞天古奇  
石千萬姿元不費神斧帝勅守六丁山夔孰敢侮白晝

中冥冥游者必持炬或絢若霞敷或蹙若波詭或豎若  
旌幢或懸若鐘鼓或虎而爪鋸或鳳而翅舞異狀紛獻  
酬清音起擊拊不知金堂仙恍惚在何許褰衣下側徑  
層嵐結瓊乳逕極罅轉深幽潭蓄風雨劣容童豎入恐  
觸蛟龍怒凜乎不可留長嘯出巖戶

遊仙華山

宋方鳳

仙華矗萬仞我乃廬其東日夕與山對今茲踏玲瓏起  
左信奔鹿當前任啼狻大嘯崖石裂一覽天宇空蒼松

飽風雨絕壑掛老龍樵斧不得睨撫根憇吾躬邈哉軒  
轅氏問道由崆峒龍髯一以遠千載非遺弓猶傳少女  
靈鍊玉於高宮山林重帝胄香火明我衷我來重懷古  
攬涕臨西風何當刺飛流一洗磊砢胸

浙江通志卷二百七十一